

# **Bases Constituyentes d'Izquierda Asturiana**

**(aprobaes nel I Congresu, xineru de 1.995)**

## **ENTAMU.**

Asturies vive nesti momentu nuna dómina importantísima pal so futuru. El negru presente de crisis xeneral en toles fasteres de la vida del nuestro país (económica, social, política, cultural...) asina como les bien poco prestoses llinies xenerales del Nuevu Orde Internacional, faen camentar a daquéen que tamos viviendo un auténticu "finis Asturiae" cuasi apocalípticu y ensin salida posible.

Énte esa revesosa situación, un grupu de ciudadanos y ciudadanes d'Asturies, exercitando la nuestra condición de talos, reivindicamos el derechu a nun ser simples espectadores de la nuestra vida colectiva. Teniéndonos por asturianos y asturianas anantes que d'otru ámbitu, talantamos Asturies como'l marcu dende'l que facer un llabor políticu qu'afite a esti pueblu nun planu d'igualdá y respetu con tolos pueblos del mundu, dende'l comecimientu de qu'ha de ser la xente que vive del so trabayu lo protagonista de la tresformación social que lo faga autor de la so propia historia, y tamién dende'l comecimientu de qu'esa tresformación pasa necesariamente pela dignificación de la propia identidá como pueblu, que ta nun llaceriosu procesu d'esborriamientu. Esta realidá ye la que mos fai conscientes de la necesidá d'una IZQUIERDA ASTURIANA.

Paezmos qu'oxetivos tabs como'l derechu d'autodeterminación permanente, esto ye, l'exerciciu continu de la soberanía nacional; la construcción d'un socialismu democráticu que recueya, nun exerciciu de síntesis, los tradicionales valores solidarios del pueblu asturianu colos universales del socialismu; una concepción ecolóxica de la sociedá, dende una perspectiva global non antropocéntrica y qu'armonice les necesidaes d'un desenrollu económicu sostenible col caltenimientu del ecosistema; la defensa a ultranza de tolos derechos humanos, denunciando tanto les sos vulneraciones como les causes de les mesmes; el trabayu na solidariedá ente los pueblos, la dignificación de la nuestra



cultura, y el puxar por una nueva ética política y l'espardimientu de los valores democráticos y solidarios, son los pegollos fundamentales sobre los qu'iguar una alternativa global al actual estáu de coses.

La voluntá d'estructurar alredu de bases afitae a la mayoría social d'izquierdes d'esti país; l'enfotu de dignificar al conxuntu de los nuestros paisanos y paisanes a la categoría de ciudadanos y ciudadanes integrales, y non meros consumidores nel mercáu publicitariu de l'*alta política*, llévos a puxar por una izquierda ilusionante y d'amplia capacidá movilizadora: socialista, adogmática y non mesiánica. Una izquierda que seya a interpretar el mundu dende la nuestra realidá. Una izquierda que sofite la cultura y respete l'ecosistema. Una izquierda, en fin, fundamente asturiana y, precisamente por eso, auténticamente internacionalista.

Pensamos que la espresión más perfecha d'esi proyectu tien de ser un partíu, una contrucción colectiva síntesis de los enfotos y aspiraciones individuales, y que globalice les estremaes reivindicaciones sectoriales y plantegue alternativas no xeneral y no concreto. Pero nun queremos un partíu-máquina, que coarte, o suplante, la llibre espresión de les persones, sinon un partíu-ferramienta pa la tresformación social y non un fin en sí mesmu. Nun queremos qu'IZQUIERDA ASTURIANA tenga el poder, sinón que seya'l preséu col que'l pueblu asturianu exercite el so poder, güei secuestráu poles maquinaries partitocrátiques y tou tipu de minorés oligárquiques. En definitiva, creemos que la única manera de construyir una democracia nel sen más auténticu del términu ye fortaleciendo la sociedá civil, talantada ésta como la suma de toos y caún de los ciudadanos y ciudadanes que viven del so trabayu, pues pensamos que l'interés del pueblu ye l'interés xeneral, mentres que l'interés de les minorés oligárquiques ye siempre l'interés particular.

A más d'un abultaran-y los nuestros plantegamientos como alloñaos de la realidá. A lo llargo la historia, acusóse una y otra vez d'utópicu a tou aquel que quería camudar la sociedá. Mas, yá fuere ceo o sero, la sociedá acababa por camudase. Eso amuesa que la historia nun ye solo una riestra d'acontecimientos ún detrás d'otru; ye un procesu, resultáu d'una actividá consciente, y la nuestra voluntá ye la d'actuar colectivamente pa qu'esi procesu vaiga empobináu hacia un futuru de mayor xusticia y llibertá. Con esi pruyimientu constituyímonos n'IZQUIERDA ASTURIANA y asoleyamos a la opinión pública les Propuestas Constituyentes que vienen darréu.



# I. El proyectu socialista democráticu d'Izquierda Asturiana.

## LES FONTES DEL PENSAMIENTU D'IZQUIERDA ASTURIANA.

**1.** La llucha pola constitución de la Nación Asturiana, la conquista de la soberanía nacional y la construcción de la democracia tan inevitablemente xunies a la llucha pola incorporación del país a les fuercies que tán güei pola causa de la llibertá y el progresu social.

**IZQUIERDA ASTURIANA (IAS)**, como preséu de tresformación social que ye, y, en tanto qu'obra colectiva dende una filosofía determinada, resultáu del pensamientu y los raigaños históricos que-y dieron orixe, basa'l so discursu políticu nes estremaes fontes del pensamientu qu'organicen güei lo que se entiende xenéricamente como la izquierda política. Somos un partíu abiertu porque nun tamos comprometíos nin con antiguos nin nuevos o futuros partíos-guía o países-paráisu, y porque reconocemos y analizamos el valir de toles aportaciones que se fixeren, dende cualisquier posición, y independientemente de que trunfaren o non, en favor de la emancipación de los pueblos. Estes aportaciones concrétese, pa nós, nel pensamientu racionalista ilustráu, los movimientos populares presocialistes, les lluches revolucionaries de los siglos XIX y XX y el pensamientu ecoloxista y les reflexones de los nuevos movimientos sociales.

**2.** Reconocemos de los ilustraos y del legáu de les revoluciones burgueses l'aniciu de la concepción de la democracia moderna, el conceptu de ciudadanu, la declaración universal de los derechos de la persona y la demostración empírica de que nun hai un orde social inmutable nin eternu, especialmente cuando esi orde ta asitiáu na arbitrariedá y la inxusticia. Rousseau, Sieyes, Marat o Robespierre, con tolos sos errores y aciertos, son patrimoniu de tolaxente enfotao na llucha poles llibertaes individuales y colectives.

Analizamos críticamente la evolución del pensamientu lliberal al



democrático-burgués, y la llucha constante por da-y contenúa eses declaraciones de derechos de la persona. Al empar, valoramos positivamente la introducción del racionalismu como pegollu fundamental de toa teoría política. Precisamente por eso, refugamos del idealismu y de cualisquier concepción esencialista o mecanicista de la historia de les sociedaes. Entendemos al sistema lliberal como un modelu políticu a superar col oxetivu de construyir una sociedá que seya a combinar la democracia política cola democracia económica. Reclamánonos del pensamientu del rexeneracionismu asturianu de Xovellanos y valoramos les aportaciones federalistes de Pi i Margall, que xunen la idega d'autodeterminación individual como persona cola d'autodeterminación colectiva como integrantes d'una comunidá humana.

**3.** Recoyemos de les lluches populares del Vieyu Réxime (movimientos campesinos antifeudales, herexíes socializantes...) y de los movimientos emancipadores non específicamente socialistes -nel sen modernu del términu- de la dómina contemporánea (babuismu, socialismos utópicos, socialismos agrarios, movimientu llibertariu) la so fe dafechu nos individuos y nel futuru y la so llucha incondicional escontra cualisquier mena de primición. De los "socialismos arcaicos", de base campesina, reconocemos la so voluntá d'algamar una sociedá democrática basada nes estructures sociales cornuñalistas.

**4.** La nuestra filosofía política presenta fondes influencias de los acontecimientos revolucionarios de la dómina contemporánea. Son, fundamentalmente, los movimientos y revoluciones socialistes, les lluches anticoloniales y los movimientos de lliberación nacional. Paezmos indispensable pa construyir güei una izquierda emancipadora l'análisis críticu del legáu políticu y teóricu de les revoluciones socialistes, que tienen el so aniciu na Comuña de París y na Revolución de los soviets de 1917, y los sos continuadores políticos nes tradiciones revolucionaries surdiés de la II y III Internacional, asina como nes lluches, a b llargo del sieglu pasáu, del movimientu obreru y popular. Entendemos al marxismu como un métodu d'análisis fundamental, tovía ensin superar, pa caltriar les formes de primición y alienación inherentes al sistema capitalista.

Como partíu de lliberación nacional que somos, nun podemos escaecer les aportaciones a la emancipación de los pueblos de les lluches anticoloniales d'Asia, África y América, que depués de la Segunda Guerra Mundial xeneraron toa una riestra de guerres campesines escontra la dominación feudal y eurocolonial o neocolonial. De toes maneres, la llucha escontra la dominación nacional nun ta solo reducida al ámbitu tercermundista. El nuestro proyectu ye permeable a les lluches nacionalliberadores que medraron a lo llargo del sieglu XX en toa Europa y l'América industrial, y que conocen dos españos fundamentales: nos principios



del sieglu, sobre too depués de la Primera Guerra Mundial (dixebra de los Imperios austriacu y turcu, independendia d'Irlanda y autodeterminación de los pueblos del Imperiu Rusu) y dende los años 60 (Quebec, Euskadi, Córcega, Chipre...). D'esta riestra d'acontecimientos nun podemos escaecer la llucha antifacista de los pueblos d'Europa na segunda Guerra Mundial.

N'Asturies, la nuestra tradición revolucionaria ta fundamente condicionada pol puxu que'l socialismu algamó nel nuestro país dende finales del sieglu XIX, de la mano d'homes como Francisco Cadavieco, Eduardo Varela o Manuel Vixil Montoto, asina como Isidoro Acevedo, fundador de la FSA y, venti años depués, del PC n'Asturies. Les lluches sindicales y polítiques de les primeres décadas, la Revolución d'Ochobre de 1934, primer casu conocíu de procesu revolucionariu socialista de vanguardia compartida, la guerra civil o la llucha antifranquista son patrimoni comú de tolos demócrates y xente d'izquierda, d'Asturies y del mundu. Persones como'l socialista González Peña, el comunista Carlos Vega o l'anarquista Higinio Carrocera nun pueden nin deben ser reducíos a oxetos de cultu esclusivista de tala o cuala tradición emancipadora, sinón que tán inscritos na llarga riestra de persones y acontecimientos de la llucha pola lliberación de los pueblos.

**IZQUIERDA ASTURIANA** reclámase como una modesta heredera más de tou esi patrimoni comú de la causa de la libertá y la xusticia.

**5.** IAS ta tarnién abierta a les aportaciones de los nuevos movimientos sociales que crecen na Europa Occidental dende la década de los 60. Les lluches estudiantiles escontra la dictadura franquista, la guerra del Vietnam o los movimientos antirracistes demostraron como ampísimos sectores de la intelectualidá y les *capas medias* yeren claramente incorporables a procesos lliberadores más amplos. D'esta dómina surden los movimientos pacifistes y antimilitaristes, resultáu de la guerra fría, l'espardimientu de la conciencia solidaria, el resurdimientu de la llucha pola emancipación de la muyer, de les cultures minorizaes y el movimientu ecoloxista. Esti últimu tien una especial importancia nel actual contestu internacional d'esborriamientu progresivu de la Naturaleza, y les sos reflexones, xunto coles de los otros movimientos sociales, llenen de conteníu y contribúin a torgar la dogmatización o interpretación mecanicista del pensamientu socialista. De toes maneres, nun iguamos coles interpretaciones que tienden a la reconstrucción de la izquierda colos nuevos movimientos sociales como úniques referencies polítiques, pues esos movimientos puen nun cuestiónar, en sí mesmos, el conxuntu del sistema, sinón solo dellos efectos del mesmu (discriminación racial o cultural, l'amenorgamientu de la muyer o l'esfarrape del ecosisterna), colo que, si nun tán enartaos nun proyectu lliberador global, tienden a ser asimilaos pol



propiu sistema y a volvese inofensivos, viéndose esto claramente na institucionalización d'un ciertu *ecoloxismu* o *feminismu*, presentaos como la interpretación más razonable y moderada de los mesmos, y quedando el so sector más combativu y militante arrequexáu y vistu delante la opinión pública como una minoría masimalista y alloñada de la realidá.

## LA RECONSTRUCCIÓN DEL DISCURSU DE LA IZQUIERDA

**6.** El socialismu atopó una metodoloxía con Marx y Engels. El marxismu ye una síntesis teórica de la llucha de la clase trabayadora pola so liberación, guía pa la so acción consciente, esto ye, pa la construcción poles persones de la so propia historia. Nesi sen ye tamién una filosofía de la praxis y tien delles dimensiones: ye visión del mundu y métodu revolucionariu, programa políticu y códigu éticu. Implica una concepción materialista del mundu opuesta al idealismu y a la metafísica. Una visión llibre de concepciones ideolóxicas y basada na observación de los fenómenos del mundu real. Poro, nun inventa la realidá; intérpreta.

**7.** El marxismu ye una teoría, non una ideoloxía. Cuando Marx y Engels entamaron a elaborar les sos teoríes refugaron tou plantegamientu que se basare nuna idega preconcebida. Ye la realidá material la qu'esiste y a curtiu plazu nun puede ser pescanciada. Solo cola observación a llargu plazu pueden adivinase les sos lleis xenerales. Asina, el marxismu nun ye la comprensión estética y global del mundu, sinón una metodoloxía pa despicalu. Les ideoloxíes son apríbriques y dogmátiques, y con ello pasen a ser falsa conciencia de la realidá, un discursu destináu a tapecer una situación de primición y inxusticia. L'actual crisis del marxismu ye'l resultáu de la so conversión, nos países del nomáu socialismu real n'ideoloxía oficial, esto ye, nun discursu dogmáticu qu'intentaba tapecer l'alienación de la revolución y la llucha de clases neses sociedaes.

**8.** La filosofía marxista axunta per primera vez na historia del pensamientu una concepción materialista de la Naturaleza, la sociedá, la historia y l'home col métodu dialécticu pa interpretar y asina tresformar la realidá. Con Marx y Engels, la teoría y el métodu interrelaciónense dafechu. El materialismu dialécticu ye una teoría y un métodu en construcción y autoconstrucción permanente: interpretando al mundu tresfórmase y tresformando al mundu, intérpretese y realízase a sí mesmu.

El materialismu históricu ye una teoría y un métodu pal análisis de la sociedá que se sofita nos estudios de les ciencias sociales particulares; estos estudios son averamientos a la verdá oxetiva que van siendo afondaos y/o



sustituyíos polos resultaos de nueves investigaciones que s'incorporen como aporte a la síntesis del materialismu históricu. Esti métodu, que podríamos nomar científicu, foi lo que fexo da-y al socialismu marxista esi axetivu del que s'abusó tanto y que sirvió pa xustificar la so dogmatización y ideoloxización. Pero esi mesmu métodu demuésttranos que la conciencia ta determinada pol ser social y que nun ye más qu'un aspectu del devenirsocial, colo que toa verdá nun ye nunca absoluta, sinón relativa; y nun ye nunca abstracta, sinón concreta.

**9.** Dende'l so nacimientu, la teoría marxista nun solo quixo ser el preséu teóricu de la clase trabayadora na so llucha pola emancipación, sinón qu'ún de los mayores enfotos de los sos fundadores foi que la propia clase trabayadora fuere l'arma material de la so realización como teoría revolucionaria. Asina, a la teoría y al métodu améstase'l factor suxetivu, la voluntá colectiva, la llucha de la persona, como condición pa midir la propia capacidá analítica y tresformadora de la realidá del propiu marxismu. La historia ye asina l'escenariu d'esi alcuentru y la praxis el camín a percorrir. El marxismu ye asina tamién una praxis alimentada pola propia historia. Y ye tamién una praxis d'idegues. Al traviés del discutiniu, la crítica, l'alderique, enriquez la cultura contemporánea y al mesmu tiempu apaez como una teoría abierta y susceptible d'incorporar nuevos elementos. Nun espoxiga como pensamientu francedor cola historia de les idegues, sinón como una continuidá de la mesma nuna nueva síntesis teórica partiendo de les sos interpretaciones y aportes.

**10.** Nestos tiempos de crisis del pensamientu marxista surge la dula de si l'actual espoxigue científicu confirma o non les sos tesis. Pero la cuestión nun ye esa. Marx y Engels nunca nun se plantegaron atopar nes ciencies naturales la confirmación de les sos teorías filosófiques, socioeconómiques y polítiques; por contra, queríen conocer, al traviés de les ciencies, el comportamientu dialécticu de la Naturaleza. Les conclusiones podrán o non camudase. El métodu sigue vixente.

**11.** Recuperar asina la capacidá crítica del marxismu pa repensase y tresformase a sí mesmu, ye noyu fundamental de tou proyectu qu'aspire a llevar la bandera d'un socialismu superador de dogmes y verdaes absolutas. Pa ello ye indispensable analizar críticamente la teoría y la praxis socialistes a lo largo tola so historia, los sos aciertos y errores, pa ser a camudar tou esi legáu teóricu y políticu nun preséu de tresformación de la realidá.

**12.** Marx y Engels tuvieron el méritu descomanáu d'asoleyar les lleis inherentes al modu de producción capitalista y da-y a la clase trabayadora una estratexa de poder resumida na conseña de conquista de la hexemonía. Tamién aceleraron col so llabor políticu, el procesu de constitución d'esta clase en



proyectos políticos autónomos. En líneas generales, podemos decir que punxeron los pegollos de la filosofía que los sos continuadores hubieron de facer espolletar.

Nos anicios del sieglu XX, Lenin foi a interpretar el cambeu del capitalismu hacia la so etapa imperialista. Al mesmu tiempu, tuvo la gran capacidá d'afayar el marxismu a les condiciones específiques del Imperiu Rusu, nun momentu históricu concretu, ellaborar una táctica revolucionaria de toma del poder y conducir con ésitu un procesu insurreccional, la Revolución d'ochobre de 1.917, que concretó les posibilidaes del socialismu y marcó l'aniciu d'una nueva dómina na historia de la llucha los pueblos.

**13.** Na so llucha por afitase y desndolcarse como teoríadel cambiu históricu, el marxismu esperimentó deformaciones y tracamundios, y tamién aportes en forma importantes y interpretaciones orixinales.

Ente los tracamundios nun iguamos col reformismu, qu'intenta tapecer el so calter tresformador y reducilu a ura filosofía positivista y alloñada de la praxis, col oxetivu de xustificar polítiques conciliadores que nun solo nun tienden a revolucionar el sistema sinón a afitalu. Ye esí'l papel xugáu pola socialdemocracia y tola riestra de recién conversos al liberalismu. Al mesmu tiempu, manifestamos la nuestra oposición al dogmatismu, visión esquemática y mecanicista que xeneraliza pal conxuntu de realidaes y esperiencies un mesmu programa y una mesma estratexa, pretendiendo universalizar les contradicciones específiques d'un ámbitu. Con esa concepción de socialismu esportable tien mucho que ver tol abanicu políticu de la izquierda enllantada n'Asturies y subordinada a estratexes estatales non alcordes cola realidá asturiana.

Ente les aportaciones y interpretaciones orixinales del marxismu sulliñamos, ensin enfotu d'apurir equí una riestra completa, nin amenorgar a naide pola so esclusión, delles de les que más mos puean servir güei pa la interpretación de la nuestra realidá nacional asturiana: valoramos los intentos de Gramsci y Togliatti por adaptar la teoría y la llucha pol socialismu y la democracia a les sociedaes del capitalismu avanzáu; los interesantísimos estudios de Mariátegui sobre'l papel de les estructures democrátiques comuñalistas na construcción del socialismu, asina como'l valir del mitu, dándo-y un conteníu social y nacional; l'exemplu moral d'Alende, asina como la concepción pluralista y democrática de la revolución chilena; pudiéremos seguir cuasi indefinidamente. Valga namás que con estos pocos nomes p'amuesar que talantamos al socialismu como un proyectu inacabáu nel tarrén teóricu y tovía por entamar como esperienciapolítica.

**14.** Nes condiciones concretes del momentu que mos toca vivir, momentu



de crisis económica y ecológica, de reforzamiento de las contradicciones interimperialistas, resultado del Nuevo Orden Mundial, afondamiento del fosu ente Norte y Sur y de diversificación y mayor complejidad de las esperiencias nacionales de la izquierda, el marxismu atópase nun momentu de gran debilidá

Fáise necesario estremar los conceptos de crisis del marxismu y crisis del socialismu. El marxismu ye una filosofía y un métodu. El socialismu, un proyectu de sociedad, y en tantu qu'un proyectu tovía por realizar, nun ye dable una crisis en dalgo inesistente. Pero'l marxismu, en tantu que teoría dialéctica, precisa d'un desendolque permanente y si esi desendolque se detién, ye lóxico qu'entre en crisis. Yá que'l so oxetu d'estudiu ye la historia de les sociedaes, precisa nuevos preseos pa interpretar les nueves realidaes y, cuando eso nun se fae, ye una ferramienta inútil.

Poru, nun tán en crisis nin la so basa materialista y dialéctica, nin los sos suxetos históricos, pero sí munches de les formulaciones surdies nos momentos previos de les esperiencias revolucionaries, asina como les sos deformaciones y distorsiones.

Asistimos a una crisis terminal de los planteamientos ideolóxicos del dogmatismu que no políticu cuayó na tesis de los modelos únicos y partíos guía, nel monolitismu y que nun foi a interpretar nin solucionar acertadamente cuestiones como la conquista del poder, el papel de la vanguardia, la interpretación totalitariadel conceptu de dictadura del proletariáu, les fases de la transición al socialismu o la identificación mecánica de la praxis internacionalista cola política exterior de talu o cualu Estáu presuntamente modélicu. La crisis del dogmatismu nun ye solo teórica, sinón tamién política y organizativa, yá que la so aplicación práctica nos países del socialismu real recién amuesó'l so fracasu históricu, y ta llevando a los sos últimos defensores al naufraxu.

Al mesmu tiempu que'l dogmatismu, la socialdemocracia tamién esperimenta la so propia escayencia. L'acabu del socialismu real sirvió p'asoleyar les contradicciones d'un proyectu que se presentaba a sí mesmu como'l socialismu democráticu y que, nin construyó'l socialismu nos países nos que llegó al poder, nin pretendió facelo. El so papel consistió en desendocar les polítiques neoliberales y antipopulares d'axuste duru en tiempu de crisis que los gobiernos conservadores nun s'atrevíen a facer. Predicando la paz social nos momentos d'espoxigue económicu, y faciendo polítiques reaccionaries nos momentos de crisis, el so papel nun foi progresivu, sinón claramente regresivu. Nin siquiera nos países del capitalismu avanzáu, onde hai más riqueza pa repartir, tien la socialdemocracia el futuru aseguráu. Más bien tolo contrario: la crisis económica ta



faciendo a los gobiernos occidentales esaniciar l'Estáu del bienestar construyíu décadas atrás, y la so corrupción moral ta levando a una situación llaceriosa a los partíos socialdemócrates chiscaos pol lladrociniu institucional. Nin nes formes, nin nos conteníos, representa la socialdemocracia al socialismu, y, cada vez menos, a la propia democracia.

**15.** Ante esa situación, y partiendo de que les idegues son invencibles mentanto nun camuden les condiciones sociales que les enxendraron, y que'l marxismu nun ye solo una metodobxía pa desplicar la historia, sinón, y principalmente, pa facela, plantégase la necesidá d'un desendolque teóricu y prácticu nuevu que supere la fosilización del marxismu y renueve teórica y metodológicamente al socialismu. Esti procesu yá ta faciéndose n'otres partes del mundu y IZQUIERDA ASTURIANA vese como integrante del mesmu. Los sos trazos principales son:

**15.1.** La redefinición y actualización de les tesis sobre l'Estáu y la democracia intentando atopar la mena más afayadiza d'exercitar la hexemonía popular al traviés de les estremaes formes d'autogobiernu que recueyan y puxen poles tradiciones de democracia directa que nacen de la esperiencia cotidiana de los y les productores o son el resultáu de la esperiencia histórico-cultural específica de cada marcu nacional.

**15.2.** La revalorización de los mecanismos de sufraxu universal y d'estructuración de la soberanía popular caltriándolos como una función social y non solo como derechos individuales que s'exercen cada ciertu timpu.

**15.3.** El reconocimientu del final del monolitismu y del modelu únicu de socialismu, asina como la valoración crítica de les estremaes esperiencias nacionales.

**15.4.** La construcción de nueves formes de relación y coordinación a nivel internacional de los partíos y organizaciones de la izquierda tresformadora, partiendo de la propia soberanía, la igualdá y el respetu.

**15.5.** La constatación de que'l pensamientu marxista ye daqué abierto al discutiniu y a les aportaciones de los nuevos movimientos sociales y esperiencias resultantes de les mutaciones esperimentaes poles sociedaes capitalistes.

Esti procesu de renovación caltién viva la idega de la necesidá del usu permanente del arma de la crítica. La nuestra concepción de la crítica supón la superación de conceptos y definiciones yá perpassaos pola historia nuna síntesis



superior no que cinca a la so capacidá de retratar y analizar la realidá presente. Ye esa la razón de la vixencia de la metodoloxía leninista del análisis concretu de la realidá concreta, o la reivindicación d'un desendrollu independiente del marxismu atendiendo al desendrollu nacional y nacional-estatal en cada país; y ye asina tamién como'l marxismu recupera la so auténtica identidá como métodu de tresformación revolucionaria de la realidá vixente.

## LA PRAXIS SOCIALISTA Y LA REALIDÁ NACIONAL

**16.** IAS quier significar la irrupción na historia d'Asturies d'un nuevu puntu de vista: el puntu de vista del pueblu asturianu. Dende esta perspectiva, nueva dafechu nel nuestro ámbitu, queremos facer una nueva síntesis teórica y programática del socialismu n'Asturies, que tien de concretase nel alcuentru ente marxismu y realidá nacional.

Atendiendo a la necesidá d'elaborar el proyectu socialista en cade país partiendo de la so propia especificidá cultural, social, económica, política... vemos como imprescindible la construcción d'una alternativa democrática y nacional concretada organizativamente nun partíu que seya a realizar esos oxetivos partiendo del fondu y rigurosu análisis de l'actual realidá asturiana, tanto en relación a ella mesma como a los restantes marcos xurídico-políticos nos que ta inserta (estáu Español, UE, OTAN, UEO...). Y esa necesidá d'un proyectu socialista específicamente asturianu ha facese analizando toa una riestra d'elementos d'estremación que determinen qu'Asturies seya un marcu concretu de reflexón y práctica política.

Pa ser a concretar política y organizativamente esos pruyimientos, tien importancia fundamental la necesidá d'estudios fondos de la estructura social actual d'Asturies, de les sos causes históriques y del so allugamientu dientro los marcos estatal y européu. Ye nesa cuestión del métodu, del usu correchu de les sos armes metodolóxicos, onde se ve la capacidá d'un partíu pa tar al altor del so pretendíu papel históricu.

**17.** El noyu central d'IAS ta asina en que la opción socialista asume dafechu los intereses y oxetivos nacionales, partiendo de que l'únicu camín pa facer internacionalista la izquierda n'Asturies ye que'l socialismu funda los sos raigaños nel suelu asturianu. Estremámonos asina del xovinismu aislacionista y talantamos la nuestra llucha pola liberación nacional y social como parte de la llucha mundial de los pueblos pola democracia y el socialismu. El nuestro proyectu nacionalponse asina en relación coles lluches emancipadores del restu del mundu, y la nuestra voluntá de construcción d'una izquierda asturianaponse en relación col procesu de



redefinición de la izquierda y el socialismo a nivel mundial.

Estos puntos de vista, que combinen el desarrollu universal y nacional del marxismu, intenten superar tanto les tesis del nacionalismu esencialista y aislacionista como les de los que talanten al socialismu como reedición d'otres esperiencias nacionales (fracasas les más de les veces) o les de los qu'intenten tapecer una realidá nacional asturiana qu'entra en fonda contradicción cola so estratexa sucursalista. **IAS** quier francar con esa visión dogmática del marxismu y fai l'apuesta d'atopar na nuestra historia, nos nuestros vezos y tradiciones, les bases universales del socialismu.

**18.** Delante esa voluntá de llucha nacional pol socialismu, surge la cuestión de si **IAS** ye o non un partíu nacionalista, y de si eso ye o non contradictorio col internacionalismu propiu de la tradición de la izquierda. Pa nós, esi problema ye irreal. L'internacionalismu de cada partíu mídense, principalmente, pola so capacidá de construyir un proyectu socialista propiu. N'otres pallabres, el movimientu más internacionalista ye, al mesmu tiempu, el más apegáu a la propia realidá nacional.

De toes maneres, nun vamos negar que, históricamente, el marxismu presentó al internacionalismu proletariu como l'antítesis del nacionalismu burgués (ente otres coses, porque'l nacionalismu decimonónicu solo podía ser burgués). Hai asina una evidente contradicción de calter dialécticu formal, solo formal, porque'l términu nacionalismu tien güei un significáu conceptual munchu más ampliu qu'hai sieglu y mediu, y lo qu'entós se talantaba por nacionalismu identifícase güei con xovinismu, esencialismu, racismu o imperialismu.

Arriendes d'esto, ta la famosa afirmación marxista de que los obreros nun tienen patria, frase favorita de los dogmáticos qu'intenten con ello tapecer la realidá nacional asturiana en nome d'un presuntu internacionalismu puru (tres del cualu ta, les más de les veces, un inconfesable nacionalismu españolista, munchu más peligrosu y reaccionariu en tantu que ye xovinista por definición). Pero esa interpretación ta errada, yá que la frase nun resume dafechu'l razonamientu que Marx y Engels fixeron nel Manifiestu Comunista. En tanto qu'escluyida del poder políticu de la nación, la clase trabayadora nun tenía nación, nun tenía patria. Pero los propios autores afirmaben que la misión d'esa escluyida clase trabayadora taba en conquistar el poder políticu, elevase a la condición de clase nacional (clase dirixente) anque de nenguna mena nel sen burgués. Esta cuestión tien una capital importancia, yá qu'enarta de modu directu cola noción gramsciana de nación popular, porque, cola construcción del socialismu, la patria pasa a ser de toos, pero non solo nun sen ideal y simbólicu, abstractu, como fai el nacionalismu esencialista, sinón nun sen material, inmediatu, concretu, yá que ye'l pueblu, la



clase trabajadora, la inmensa mayoría del país, la poseedora del poder, esto ye, la clase nacional. D'esta mena, solo cola construcción del socialismu ye a constituyise la nación d'afechu.

Con esto amosamos el fondu calter nacional de la clase trabajadora, pero ésta ye tamién internacionalista porque, históricamente, al tar escluyida del poder políticu, nun tenía capacidá de decisión sobre'l futuru del so país (esto ye, a autodeterminase). Yera la clase dominante la que lo decidía too. Pero la clase dominante dexó de ser nacional cuando se fixo imperialista, o vasalla del imperialismu. Sustituyó la defensa de los intereses del país, de la soberanía y la independencia, pola espansión violenta y la conquista, o la sumisión a la mesma, poniendo en pelgru la llibertá de los demás pueblos y entamando una espiral na que llega a amenazar el futuru mesmu de les naciones, tanto cultural como, nos casos más sangrantes, físicamente. La clase trabajadora ye asina nacional cuando llucha escontra l'imperialismu exterior, pero ye internacionalista porque defende la independencia y la soberanía del propiu país y de tolos demás. Liberándose a sí mesma, ayuda a los demás a lliberarse, y ayudando a los demás a lliberarse, contribúi a lliberarse a sí mesma.

**19.** ¿Ye entós **IZQUIERDA ASTURIANA** un partíu nacionalista? Somos un partíu socialista y consecuentemente, talantamos al marxismu como'l nostru métodu d'análisis de la realidá que mos arrodiada. Y resultáu d'esi análisis concretu de la nuestra realidá concreta, llegamos a la conclusión de que p'algamar los nuestros oxetivos cimeros (esto ye, la construcción d'una democracia socialista n'Asturies con tolo qu'ello implica) faise necesario desenvolver equí y agora una estratexa nacionalista. Al tar el país nuna situación de postración d'afechu, faltu de soberanía política y económica, y permanentemente agredíu na so cultura y ecosistema, talantamos al nacionalismu como la estratexa política de defensa de la nuestra identidá y derechos nacionales que permita conquistar l'espaciu democráticu suficiente como p'algamar los nuestros oxetivos de soberanía nacional. Pero nun vemos al nacionalismu como consustancial al nostru proyectu, como un códigu de valores apriorísticos, esencialistes, ideolóxicos en definitiva, y, poro, ajenos a la izquierda y al socialismu. Asina, **IAS** ye, políticamente, un partíu nacionalista; ideolóxicamente, non, porque nun entendemos al nacionalismu como un fin en sí mesmu.

**20.** Pa nós, nun se trata de cortar pela freba ente l'antigu movimientu obreru d'anicios de sieglu (socialismu, comunismu y anarquismu) y el nuevu nacionalismu d'izquierdes. Nun queremos una francedura col nostru pasáu. Trátase d'entender al proyectu socialista soberanista, que llucha pola lliberación nacional, como la más consecuyente continuación histórica de la llucha del



movimientu obreru asturianu. Esto ye, **IZQUIERDA ASTURIANA** quier ser la referencia política del socialismu na nuestra dómina, un socialismu alimentáu pola nuestra y propia gran tradición de llucha obrera y popular, de les esperiencias históriques que-y tocó vivir al nuestro país a lo llargo de la so historia. Trátase, en definitiva, de reconciliar la llucha pola lliberación nacional col socialismu clásicu asturianu, y a esisocialismu asturianu cola especificidá nacional del país.

**21.** Esti razonamientu llévanos a la disxuntiva de la izquierda nacionalista-izquierda nacional. La izquierda d'Asturies tovía nun puede ser nacional en tanto que la especificidá nacional asturiana tovía nun ye asumida con toles sos consecuencias pol conxuntu la población; tien de ser nacionalista porque tovía ye necesaria la llucha por caltener la nuestra identidá escontra l'asimilacionismu nacionalista español, yá que tou nacionalismu naz siempre escontra otru. Cuando Asturias seya soberana y nun haiga dengún poder foriatu que mediatice o condicione'l so llibre desenrollu, entós la estratexa nacionalista será superada pola propia realidá, y, cola constitución dafechu de la Nación Asturiana, la izquierda pasará de nacionalista a nacional.

Pero **IAS** ye tamién un partíu nacional nel sen de partíu autóctonu. Somos una espresión de la nuestra historia, de la nuestra cultura, de la nuestra realidá sociopolítica y, tamién, de la nuestra idiosincrasia. Y esto ye asina porque entendemos que cada país ye una combinación única y irrepetible, non porque tengamos nengún petite aislacionista, sinón porque la combinación d'elementos de clase, económicos, culturales, sociales, xeográficos, históricos, son siempre únicos y irrepetibles; magar qu'haiga semeyances parciales con otros países o coyuntures. Y pa un partíu como **IAS**, qu'aspira a ser el motor del cambiu social, caltriar esa combinación ye indispensable p'algamar l'oxetivu de constituyise nel partíu de la clase auténticamente nacional y, como consecuencia, nun partíu nacional.

## LOS TRAZOS DEFINITORIOS D'IZQUIERDA ASTURIANA

**22.** Arriendes de la nuestra definición como partíu socialista qu'assume'l marxismu como métodu d'análisis de la realidá, y de partíu nacional, autóctonu, que desenrolla una estratexa nacionalista, **IZQUIERDA ASTURIANA** cree necesaria una mayor definición política que-y dea conteníu a esi modelu social por construyir -el socialismu- y a esa estratexa a seguir -la nacionalista-.

**23.** En primer llugar, **IAS** ye un partíu formáu por ciudadanos y ciudadanes. Esta constatación, qu'aparentemente podría entendese como trivial, tien pa nós munchu mayor significáu.



Ye la condición de ciudadanu/ciudadana llogru fundamental y irrenunciable de la llucha democrática de los pueblos, que pon a la persona en conesión cola colectividá de los sos iguales llenando de conteníu la espresión sociedá civil. Reivindicamos espresamente'l derechu inalienable qu'asiste a los ciudadanos y ciudadanes pa participar nel discutiniu y na xestión de les cuestiones que-yos afecten, tanto individual como colectivamente, y reivindicamos esi derechu col xeitu más efectivu posible, esto ye, exerciéndolu. Nuna dómina, amás, na que, dientro del nuestro ámbitu, paez que xorrez l'apatía, el desinterés o l'escepticismu pola participación política, y nel qu'asocede l'pergrave procesu pol que poderosos resortes d'influencia y control social consienten, o, más entá, afalen la desmovilización cívica, queremos iguar cola nuestra constitución en partíu políticu, una consolidación d'afechu n'aquel derechu.

Paezmos qu'una ciudadanía integral, igualitaria y activa ye condición sine qua non pa la construcción d'una auténtica democracia, nel sen más auténticu y fondu del términu.

D'otra parte, una nación ye una comunidá de comunidaes y la pertenencia a una comunidá abondo pequeña como pa reconocer el valir del individu u ye fundamental pa enllazar a cada persona cola humanidá, pues fai que se sienta responsable directa de los sos propios asuntos. Asina entendemos el conceptu de democracia como inseparable del de descentralización, lo qu'empata col históricu carácter policéntricu d'Asturies, que tamos por reforciar.

**24.** Consecuentemente colo anterior, **IZQUIERDA ASTURIANA** ye un partíu demócrata, esto ye, partidariu del poder popular. Y ser partidarios del poder popular significa una concepción ascendente de la estructura política d'un país, entendiendo que ye la masa ciudadana'l pegollu sobre'l que diredu edificando, d'abaxo arriba, tola estructura institucional qu'igüe, y nun torgue nin restrinxa, la soberanía popular.

Y ser demócrates va tamién fundamente amestao, y nun doble sen, cola idega de nación soberana. D'un llau, un pueblu solo ye soberanu cuando ye llibre de toa primición esterna, cuando nun ta enseru, independientemente de la so voluntá, nuna estructura político-institucional más amplia; pero pa ser soberanu tien de tartamién llibre de toa primición interna, esto ye, de toa triba de minoría oligárquica que suplante o condicione la voluntá popular. Al mesmu tiempu, la nuestra concepción democrática de nación soberana va xunida a la recuperación y actualización de les formes comunalistes y de democracia directa tradicionales na sociedá asturiana, güei cuasi esborriaes pol esmantelamientu del mundu rural y la suplantación d'estes formes polítiques poles instituciones oficiales.



Ser demócrates güei tamién tien pa nós otra connotación, que ye la de revolución. Somos revolucionarios porque queremos la tresformación fonda y estructural del país en porgüeyu de los sectores populares, y tamos por elevar esos sectores a la categoría de clase dirixente de la nación, siendo esto, en definitiva, la construcción de l'auténtica democracia.

**25. IZQUIERZA ASTURIANA** ye tamién un partíu ecoloxista, porque'l nostru proyectu tresciende al simple ambientalismo y/o conservacionismu y sometemos a crítica toa teoría económica que nun contemple l'ecosistema nin la demografía. Consecuentemente cola concepción marxista de que les dos fontes de bayura son la tierra y el trabayu, paezmos imposible iguar un proyectu políticu progresista que nun asuma la ecoloxía política como parte integrante de só. Al mesnu tiempu, estremámonos tanto de les corrientes de la izquierda enfotaes nun llocu productivismu que tapez la realidá medioambiental, como de ciertos teoríes ecoloxistes qu'entienden la ecoloxía política como daqué independiente de la formación social y les relaciones de producción.

**IAS** tamién ye un partíu ecoloxista porque'l so compromisu cola Naturaleza va más allá de les declaraciones xenerales. El nostru proyectu va tamién empobináu hacia la concienciación de la sociedá, puxando por una ciudadanía comprometío cola defensa de ecosistema, pues el respetu a les persones ye consustancial al respetu al mediu que mos arrodiá.

**26. IZQUIERDA ASTURIANA** ye laica porque puxamos pola neutralidá dafechu del Estáu en materia confesional. Respetando'l fechu relixosu en tanto qu'espresión de la llibertá individual, entendemos ensin embargu que ye una cuestión privada de la persona que nun puede dir condicionada por nenguna triba d'institución o lobby. Vemos a les estructures relixoses como poderosos grupos de presión que, a lo llargo de la historia, xugaron, nos más de los casos, un papel negativu pa los pueblus, pola so función ideolóxica de xeneradores de falsa conciencia, pola so identificación colos intereses de la clase dominante y pola so oposición dafechu a cualquier tipu de progresu científicu o investigación filosófica, magar que reconozamos el papel que dellos movimientos relixosos xugaron, y xueguen na actualidá, pa la causa del progresu social, precisamente cuando les mases de fieles francien cola tutela ideolóxica de les xerarquies eclesiástiques.

Pero ser laicos nun ye solo ser aconfesionales. Trátase tamién de refugar cualquier mena de dogmatismu, de mesianismu, d'interpretación cuasi-relixosa de determinaes filosofíes o de l'asunción de verdaes absolutas y inmutables, que



lleven a l'alienación individual. **IAS** ye un partíu abiertu (y un partíu políticu, non un partíu ideolóxicu) qu'almite dientro de só a creyentes y non creyentes, y nun afita nin quier afitar más filosofía o códigu de valores que los oxetivos y reflexones del nuestro proyectu, libremente asumíos polos sos militantes. Defendemos de mena irrenunciable l'autonomía moral de les persones p'asina reforzar l'espíritu cívicu que garantice la vitalidá de la democracia.

**27. IZQUIERDA ASTURIANA** ye un partíu republicanu porque asume que la base de la democracia ye la llibre asociación de ciudadanos y ciudadanes, y que les responsabilidaes y cargos públicos de la sociedá tienen de tar siempre suxetos a control y llibre elección de la ciudadanía. Refugamos asina de la teoría esencialista qu'entiende que la máxima representación del Estáu tien de ser vitalicia y hereditaria por mor d'una cuestión de sangre. Entendemos la Monarquía como una institución incompatible cola idega democrática consecuente, y identificamos la República cola noción de soberanía. Si queremos un Pueblu Asturianu soberanu pa decidir el so futuru, queremos tamién la llibertá pa eleixir tobs nuestros representantes.

Entendemos asina que la forma republicana del Estáu ye la estructura política más afayadiza p'algamar el nuestro modelu de democracia socialista

**28.** Resultáu de lo enantes espuesto, la definición política y señes d'identidá d'**IZQUIERDA ASTURIANA** resúmese en que ye un partíu socialista qu'asume'l marxismu como métodu d'análisis de la realidá, con voluntá de constituyise na Izquierda Nacional del país, y que concreta les sos aspiraciones polítiques nun proyectu de calter cívicu, democráticu, ecolóxicu, laicu y republicanu.



## II. Los presupuestos básicos pa una alternativa d'izquierda n'Asturies.

**29.** L'acción política d'**IZQUIERDA ASTURIANA** va empobinada a algamar unos oxetivos estratéxicos qu'entendemos como la realización d'afechu del llabor políticu qu'agora imprimamos a desenrollar. Asina, el trabayu que se faga nel presente sirve pa da-y conteníu real a esos oxetivos a llargu plazu que güei puen abultar utópicos o excesivamete alloñaos de la realidá.

Estos oxetivos constitúin les línies estratéxiques elementales y irrenunciabiles pa iguar un proyectu nacional y d'izquierdes, una alternativa global al actual marcu políticu, económicu, social, medioambiental y cultural nel qu'Asturies ta inserta.

El proyectu d'IZQUIERDA ASTURIANA resúmese en siete puntos: l'exerciciu consciente de la soberanía nacional, al traviés del derechu d'autodeterminación; la construcción d'una democracia socialista; el desenrollu d'una concepción ecolóxica global; el respetu y realización d'afechu de los Derechos Humanos; l'apuesta pola solidariedá activa ente los pueblos; la dignificación de la cultura asturiana y l'espardimientu d'una nueva ética social.

### POL DERECHU D'AUTODETERMINACIÓN, HACIA LA SOBERANÍA NACIONAL.

**30.** La interpretación reduccionista d'esti términu tiende a velu namás que como'l derechu, exercíu nun momentu concretu, d'una nación a formar un Estáu propiu. Nós entendemos l'autodeterminación como la capacidá constante d'un pueblu de decidir llibremente'l so futuru; y esa capacidá cinca tamién a cuestiones económiques, sociales, culturales, etc., esto ye, a tou tipu de problemes que puean afectar a una comunidá humana. Ye por esto qu'entendemos l'autodeterminación non como un oxetivu concretáu nel tiempu, sinón como una ferramienta al traviés de la qu'una sociedá igua permanentemente la so soberanía.



**31.** La idea d'autodeterminación tien un doble aspectu que pon al individu en relación cola comunidá: l'autodeterminación ye personal -el derechu d'un ciudadanu o ciudadana a escoyer llibremente'l so futuru y, al traviés de la codeterminación o comuña d'intereses colos sos iguales, pasa a constituyir l'autodeterminación colectiva de la nación consciente de los sos derechos. Trátase, asina, d'iguar una estructura política que faga posible la realización dafechu de los individuos nel marcu más ampliu, colectivuu, llibremente escoyíu por ellos mesmos; esto ye, facer que'l llibre desenrollu de caún seya condición pal llibre desenrollu de toos.

**32.** El conceptu d'autodeterminación ta tamién fundamente relacionáu con otros dos: los de democracia y soberanía nacional. El marcu democráticu ye l'unicu posible pa qu'un pueblu seya p'autodeterminase, exercer la so soberanía, non en términos abstractos o ideales, sinón concretos y materiales. Asina, asociamos una vez más la noción de democracia a la de poder o soberanía popular, y a ésta cola constitución de los marcos xurídico-políticos que posibiliten l'exerciciu continu d'esi derechu.

Por contra, l'actual marcu llegal del Estáu Español, estructuráu na Constitución de 1978 y el sistema de les Autonomíes, pon-y llendes a la capacidá d'autogobiernu de los pueblos del Estáu, nun reconociendo más qu'una insatisfactoria capacidá competencial. **IZQUIERDA ASTURIANA** afirma que nun puede haber poder nengún percima de la voluntá soberana del pueblu asturianu, y por ello'l primer puntu de los nuestros oxetivos ye la necesidá d'un marcu xurídico-políticu que reconozca a Asturias como la única depositaria del derechu a decidir soberanamente'l so futuru.

**33.** El nuestro proyectu soberanista implica una concepción ascendente de la soberanía nacional (son los ciudadanos y ciudadanes los que formen la nación, y ye ésta, soberana, la que decide llibremente si quier, o non, ensertase nun marcu políticu más ampliu, como una Federación plurinacional) n'oposición a la descendente vixente (na que l'Estáu central ye soberanu per sé y decide voluntariamente si otorga o non competencies a los pueblos xuncíos a él). Lleva implícitu tamién la defensa de les relaciones horizontales ente tolos pueblos (y non col Estáu central como intermediariu, como pasa agora), d'igual a igual, consecuentemente col nuestro pensamientu solidariu y abiertu hacia tolos pueblos d'Europa y del mundu.

Esta concepción ascendente de la soberanía nacional identifícase, nesti momentu históricu, cola de soberanía popular, yá que, pol nuestro calter de partíu socialista democráticu, vemos al quartu Estáu, al pueblu trabayador, como



l'auténtica clase nacional, en tanto que ye la que col so llabor cría la riqueza del país frente a unes clases burgueses que n'Asturies cumplen un papel parasitariu dafechu, al tar subordinades al mayor empresariu capitalista del nuestro país, que ye'l mesmu Estáu Español, dándo-y asina al marcu asturianu un calter cuasi colonial. La burguesía asturiana, al renunciar hasta'l momentu a constituyise en clase nacional, y asumir voluntariamente un papel subsidiariu de la oligarquía estatal y cómplice col procesu d'esborriamientu de la nuestra cultura, france dafechu colos intereses del conxuntu del país, asitiándose asina al marxe del mesmu. En tou casu, **IAS** nun asume un planteamientu determinista d'esti procesu, y ye consciente de que na actual situación ye dable un cambiu de dirección nestos sectores sociales si estos apuesten por una salida nacional a l'actual crisis d'esti modelu dependencia económica. La posibilidá de qu'esto seya asina nun implicaría un cambiu cualitativu del nuestro oxetivu soberanista popular, sinón un replanteamientu de la nuestra táctica al esistir una articulación política d'esos sectores sociales colos que quiciabes puidere ser posible la coincidencia na reivindicación d'unos puntos mínimos.

## POR UNA DEMOCRACIA SOCIALISTA

**35. IZQUIERDA ASTURIANA** afítase na necesidá histórica de la construcción d'una democracia socialista como la única solución al fatáu de problemes que güei sufre Asturies y el restu del mundu. Entendemos al socialismu non solo como un modelu económicu, social y políticu por facer, sinón como una etapa de mayor xusticia y llibertá, un pasu alantre, na evolución de la sociedá asturiana y les demás sociedaes. Estos dos conceptos nos que concretamos les nuestres aspiraciones -democracia y socialismu- precisen d'un fondu esclariamientu terminolóxicu col fin d'estremase d'otres corrientes polítiques que tamién faen usu d'esos términos.

**36.** Frente a los modelos de democracia históricamente existentes nos dos últimos siglos, la democracia liberal o formal, na que la élite económica ye la que controla'l poder políticu real, y la democracia social o gobiernu pal pueblu, pero ensin el pueblu, na que domina una minoría burocrática y que foi la vixente nos países del antiguu bloque del Este entendemos a ésta como'l gobiernu del pueblu, pal pueblu y pol pueblu, esto ye, el poder popular que ye'l so auténticu sen etimolóxicu. Vémosla asina como un ideal de llibertá, soberanía popular, igualdá, xusticia social, participación y solidariedá non realizáu dafechu históricamente. Esti ideal asitia nel centru de la preocupación democrática a la persona como ser social y a la sociedá como'l productu de la so voluntá y acción consciente.

**37.** La experiencia histórica demuestra que na actualidá y nel entornu



políticu nel qu' Asturias ta inserta el procesu de llucha de clases cuayó nuna institucionalidá políticoestatal de tipu democrático-liberal, con un calter de clas definíu y unes llendes determinaes polos intereses de les élites económiques dominantes. En tou casu, la democracia como ideal nun ye reducible nin a los sos aspectos meramente institucionales, nin a una cuestión únicamente clasista.

Pero la democracia nel réxime capitalista tien munches inxusticies. Nel aspectu económicu y social, el control de los medios de producción por una minoría oligárquica lleva a la explotación de les persones que vienden la so fuerza de trabayu y al paru estructural, y, nos casos más sangrantes, a la prohibición y a la fame de peramplios sectores sociales; a la esclusión de gran númeru d' homes y muyeres en materia de salú, vivienda o cultura; a la falta de soberanía de munchos pueblos y naciones; a la marxización social de toa triba de minoríes (étniques, relixoses, sexuales...); al esborriamientu de la Naturaleza por dir a la gueta'l beneficiu priváu a tou preciu; too ello nuna dómina na que la ciencia y la técnica tán en condiciones d'asegurar un modu de vida dighu a tolos habitantes del planeta.

Como consecuencia d' esta situación social, no políticu la democracia liberal redúzse a la escoyeta de les élites dirixentes. Esto lleva a la espropiación política de la mayoría de la población, a la competencia ente grupos corporativos y al reforciamientu d'estructures estatales más burocratizaes y autoritaries. Ensin embargo, la gran habilidá del lliberalismu ye la d'apropiase del conceptu de democracia, oponiéndolu al modelu socialista, presentáu como antidemocráticu. Esta situación ye'l resultáu tanto de la propia capacidá de la propaganda liberal como de los errores y insuficiencias de la izquierda.

**38.** Asina, al absolutizase l'afirmación de que solo esiste una democracia de clase, cayóse munches veces n'asumir al Estáu liberal-burgués como una esencia inmutable nel tiempu, impuesta en bloque y d'una vegada polavoluntá de la clase dominante, y al enfotase na crítica al calter de clase de la democracia llegóse a tracamundiala cola crítica a la democracia mesma, dando asina la imaxe de ser antidemocráticos, mentantu'l pensamientu liberal (que nel so orixe nun yera democráticu) pasaba a presentase como'l representante cimero de la democracia, identificándola como daqué realizable namás que nun réxime capitalista.

Ensin embargo, históricamente'l procesu democráticu nun s'agotó na estructura político-institucional vixente. Foi la llucha y la participación de peramplios sectores sociales la que foi enanchando les llendes de la democracia, tanto nos aspectos políticos -como'l sufraxu universal- como nos sociales -como la xornada llaboral d'ocho hores o'l cubrimientu estatal de la salú, la educación o les



xubilaciones frente a un réxime lliberal bien pocu dispuestu a les concesiones. Tolos llogros, toles ventayes sociales de les que güei esfruta la clase trabayadora del Primer Mundu capitalista, nun son el resultáu de les victories del lliberalismu, sinon de les sos derrotes.

**39.** La concepción socialista democrática que nós proponemos nun consiste na refuga de los postulaos de la democracia lliberal -que son vistos como un gran llogru de la revolución burguesa- sinón na materialización d'esos postulaos al traviés de tresformaciones económiques y sociales que desanicien los privilexos clasistes derivaos de la propiedá privada de los medios de producción. Retomamos asina los valores de la democracia como un ideal a realizar y unes conquistes reales a algamar, al traviés d'una concepción orgánica democracia-socialismu, asumiéndolos non como elementos complementarios, un anantes y un depués, un preséu y un oxetivu, sinón como componentes d'un mesmu principiu.

Pa nós, nun hai principios socialistes que nun tean asitiaos nel ideal democráticu. La democracia nun ye solo la vía pa llegar al socialismu, sinón la garantía mesma de la so realización, y el socialismu nun ye solo un oxetivu o un ideal sinón el preséu pa construyir la democracia dafechu. **IZQUIERDA ASTURIANA** ye asina demócrata porque tien una reflexón y una praxis democrática, que mos define pol socialismu.

**40.** La llucha de la izquierda pola democracia nun significa retroceder a la democracia lliberal-burguesa, porque ésta, en tanto que parte del presupuestu de l'atomización de la sociedá n'individuos abstractos, interpreta de mena formal y idealista el conceptu de voluntá xeneral en función de los intereses particulares d'una clase que domina sobre les demás y constitúi por tanto una forma de dictadura. La democraciadafechu que nós proponemos solo ye dable nun contestu nel que se constituya'l poder popular cola espropiación del poder políticu de toa minoría oligárquica, siendo asina l'Estáu'l resultáu de los intereses y de la voluntá política d'una mayoría social que dicta la so llei al conxuntu'l país, siendo, nesisen, otra forma de dictadura.

Esto empata directamente col conceptu de dictadura del proletariáu, tan masuñáu como malinterpretáu por unos y otros. El lliberalismu y la socialdemocracia usáronlu pa presentar al socialismu como daqué antidemocráticu, mentanto les corrientes más dogmátiques (y, poro, ideoloxizantes) de la izquierda fixeron una interpretación autoritaria del mesmu, entendiéndolu tamién como otra dictadura, nel sen más represivu del términu, nesti casu d'una minoría burocrática que, al marxe de tou control popular, dicía actuar en nome d'esimesmu pueblu. El fracasu, bien conocíu por toos, d'esos modelos autoritarios truxo como



consecuencia'l desprestixu del términu dictadura del proletariáu, cuando'l significáu fondu y orixinal ye precisamente'l de dictadura de la mayoría, esto ye, la democracia d'afechu. De toes maneres, y teniendo en cuenta que les palabres son pa comunicase, ye evidente que nel actual contestu históricu l'usu indiscrimináu d'esti términu nun sirve pa desplicar el so conceptu, colo que terminos como democracia socialista, democracia d'afechu o poder popular cumplen muncho mejor esa función. Asina, cuando **IAS** s'aluga ente les fuerces que lluchen por un socialismu democráticu, nun lo dicimos porque entendamos que'l socialismu puea ser non democráticu, sinón como una axetivación que se fai necesaria, na actual situación, pa estremase d'otres esperiencias acabantes de finir y que la propaganda lliberal presenta como paradigmátiques de la izquierda.

**41.** Arriendes d'esto, **IZQUIERDA ASTURIANA** entiende necesario estremase tamién de la socialdemocracia, yá que sí'l nuestro proyectu socialista democráticu tien como oxetu superar les llendes estructurales del sistema vixente, les propuestes y la esperiencia histórica d'esta corriente ideolóxica adáptense a la estructura capitalista, asumiendo voluntariamente la xestión del sistema y conformándose con facer curties reformes nelli, arrenunciando por ello a la construcción d'una nueva sociedá superadora de la qu'ellos intenten afitar.

Ye cierto que la socialdemocracia cola so estratexa de colaboración de clases, algamó en dellos países de capitalismu avanzáu ameyoramientos, inclusive en forma valorables, pero en dengún país foron pa subordinar l'espoxigue económicu capitalista a los intereses de la sociedá. Ye por esto qu'esta corriente tea tamién fundida nuna crisis cásique tan fonda como la de los partíos que sofitaron al socialismu real. Y ye porque la colaboración de clases furrula mejor nuna sociedá n'expansión, cuando hai daqué pa repartir. Pero la reconversión estructural de la industria, el desplazamientu d'un númberu pergrande d'empreses tradicionales poles multinacionales a terceros países traen pergraves problemes económicos y sociales. Nestes condiciones, la colaboración de clases pierde la base material de la so razón de ser, tanto nos países económicamente avanzaos, en procesu d'esmantelamientu del Estáu del Bienestar, como nos países del nomáu Tercer Mundu, nos que la probitú ye tala que la paz social nun ye dable.

**42.** L'oxetivu cimero de construcción de la democraci socialista -estremada tanto de la socialdemocracia como de les recién acabantes esperiencias del Este européu- asume que los medios, los preseos p'algamar esi oxetivu han de ser igualmente democráticos. Ye un procesu de cambios, tanto dende dientro de la institucionalidá vixente como dende fuera, construyendo nueves formes de participación popular, y con ello una nueva hexemonía, un nuevu poder. Trátase asina de superar la teoría y la praxis dominantes que reducen la democracia



existente a los otros expresiones estrictamente político-institucionales y la participación popular a unas elecciones cada cuatro años. Consolidar y avanzar en democracia supone esa doble lucha política y popular reivindicativa de mejores condiciones de vida para los asturianos y asturianas. Esta propuesta implica a todos los sectores populares y precisa para ello la coincidencia estratégica de toda una red de organizaciones sociales, y no solo político-electorales, que sepa a elaborar una alternativa conjunta en todos los estadios de la vida social. Esta estrategia lleva así a la elección de un camino de transformaciones económicas, sociales, políticas y culturales en el que el consenso de grandes mayorías nacionales y el que fija los ritmos y plazos de los cambios. Este consenso, activo, no pasivo, expresa también al través no solo de las elecciones institucionales, sino también de todo tipo de plebiscitos y consultas populares que pueda dirigiéndose a la política de la gran masa de la población.

El nuestro concepto de consenso para crear la nueva hegemonía no tiene nada que ver con la idea existente del consenso como compromiso entre fuerzas antagónicas y contradictorias -en el que una de las partes ha de hacer necesariamente concesiones sustanciales que no son sino una renuncia tapada- sino como la convergencia de sectores populares con enfoques semejantes e intereses no contradictorios con el objetivo de alcanzar una síntesis que articule una nueva mayoría nacional. Este consenso no es solo necesario para sancionar el régimen existente, sino también para crear las formas del nuevo. De esto deriva una realidad fundamental: sin mayoría popular favorable al socialismo, no son posibles las transformaciones socialistas, o al menos no es garantizable la continuidad en el tiempo. Creer que puede construirse la democracia socialista solo con el apoyo de una minoría consciente y sin el amplio consenso popular, es entender la revolución socialista como obra de unos meses, de un garapiellu de elecciones. Y es, poro, traicionar la esencia misma del pensamiento democrático y socialista.

La revolución, para nosotros, no es un acto apocalíptico y explosivo, sino el resultado de muchos esfuerzos y fricciones. Es, sobre todo, un proceso de cambios y de disputa de la hegemonía que solo es posible ensanchando y radicalizando los límites de la democracia. Un proceso histórico de acumulación de fuerzas económicas, sociales, políticas, culturales, éticas... que lleve a avances y cambios estratégicos en beneficio de las fuerzas populares y de izquierda que se mueven en la realidad nacional. Pero este proceso no es una línea trazada, uniforme, sino que el paso de un modo de producción a otro implicará unas fases más aceleradas, otras más tardías, incluso con compromisos transitorios entre las fuerzas contendientes. Un proceso dialéctico, en definitiva.

**43.** La concreción de una democracia socialista en Asturias pasa, para



**IZQUIERDA ASTURIANA** per entender que'l socialismu nun ye solo un réxime políticu, económicu y social sinón la organización mesma de la sociedá civil; la so participación, educación y incorporación directa a la xestión pública ye la mesma razón de ser del socialismu.

En primer llugar, los y les trabayadores tienen de disponer non solo *de iure*, sinón tamién *de facto*, tanto de los medios de producción, como de los que permiten organizar y meyorar les sos condiciones de vida. La socialización nun debe ser entendida nun sen estrictamente material-productivu, sinón tamién como una relación social. Nesos condiciones la estatización por sí sola nun ye abondo. El procesu de socialización inclúi'l respetu a les formes pluralistes de propiedá, xestión y alministración, en función de razones d'utilidá social. La realización dafechu d'esti modelu solo ye dable depués d'un procesu d'educación del conxuntu de los y les trabayadores na llucha democrática precedente al logru d'esi control de los medios. Per otru llau, l'autoxestión tien de combinase cola planificación democrática de la economía col oxetivu de racionalizala, torgando'l crecimentu descomanáu d'unes rexones en perjuiciu d'otres y curiando por subordinar el crecimentu económicu a la realidá medioambiental.

Nel aspectu políticu-institucional, la democracia socialista estructúrase nun Estáu democráticu de Derechu, pluralista y pluripartidista, que garantice'l control ciudadanu de la so xestión, la xixilancia sobre la protección y desenrolle de los derechos humanos y la igualdá d'oportunidaes. Poro, el gobiernu habrá de tar suxetu al xuciu popular al traviés d'elecciones democrátiques en tolos ámbitos, con multiplicidá d'órganos de poder, resultáu de la descentralización.

Entendiendo que la soberanía popular ye la única fonte lexítima de poder, y que la base del socialismu ye'l so apoyu mayoritariu, habrán d'esistir tamién los preseos democráticos pa salir d'esi réxime si esa ye la voluntá democrática de la mayoría.

## POR UNA CONCEPCIÓN ECOLÓXICA GLOBAL

**44.** El pone-y llendes al procesu d'esfarrapamientu de la Naturaleza, que llega a poner en peligru la esistencia mesma de la especie humana, ye ún de los retos fundamentales de la nuestra dómina. Polución, recalentamientu atmosféricu, radiactividá, mengua de la capa d'ozonu, lluvia ácida, deforestación, desertización, fame... nun son más que'l resultáu del sistema políticu-económicu vixente, enfotáu n'algamar el mayor beneficiu priváu al preciu que seya, y que nun se detién ante los costes humanos o medioambientales qu'esos polítiques insensates y irresponsables puean tener.



La desigualdá del sistema ye evidente dende'l puntu de vista ecolóxicu (como dende tolos demás) nos países probes. El colonialismu ayudó al xorrecer económicu d'Occidente, dexando probitú y estrozu ecolóxicu, y güei, dende les cúpules del poder económicu, esto ye, el Bancu Mundial y el Fondu Monetariu Internacional, ufiértense donadíes a mui altos intereses. Los países del Tercer Mundu, afogaos na probitú, tando yá nun procesu d'esborriamientu de los sos recursos naturales pa vendelos a preciu de saldu, terminen por aceptar les condiciones d'aquellos a los que tán hipotecaos, afincando nes sos tierres les fórmules económicques y industriales más agresives pa col medioambiente, a cambiu, nos más de los casos, d'arriquecer a les oligarquies locales embaxo d'una mázcara d'intentu de crecimentu económicu. N'Asturies, el fondu estrozu ecolóxicu que vivimos ye'l resultáu lóxicu del propiu procesu d'industrialización que se dio nesti país, caracterizáu pol crecimentu incontroláu de les industries extractives pesaes, la falta d'estudios previos y la poquísima atención a les comarques que dexen de ser rentables (dende'l puntu de vista económicu priváu), condergándoles a ser tierres ermes y desfeches. Por si fore poco, l'alternativa reindustrializadora p'Asturies pola que se puxa güei dende les instancias oficiales ye la del modelu tercermundista d'industries y actividaes altamente contaminantes y d'esplotación de los recursos forestales, n'especial cola plantación d'especies foranies, sobre too l'ocalitu, qu'hipotequen el futuru del campu asturianu.

El problema ecolóxicu tien de vese nel so conxuntu, y les solucibnes globales, pa la xeneralidá, pasen per un cambiu drásticu del sistema económicu a nivel mundial. El capitalismu nun ye compatible col respetu pola Naturaleza, y basámonos pa dicilo en que les bases del sistema son la riqueza que-y dan la fuerca de trabayu y los recursos mundiales y los gastos que se faen sobre ellos, y en que'l so fin cimera ye la perpetuación de la desigualdá y la primición de les persones poles persones, y d'unos pueblos y unes cultures sobre otros pueblos y otre cultures.

Falar entós de problema ecolóxicu ye tanto como falar de desigualdá, consumismu y modu de producción.

**45.** Agora la izquierda ta llamada a desenrollar una concepción socialista de la ecoloxía. Una de les paradoxes de la nuestra dómina ye que, anque'l socialista foi quiciabes el primer movimientu políticu del mundu contemporaniu qu'avirtió sobre los riesgos del crecimentu incontroláu, los sos continuadores políticos nun foron a materializalo de mena consecuente. Por contra, nos países del namáu *socialismu real* cayóse les más de les veces nun llocu y irresponsable productivismu que truxo consecuencias cásiqye más graves como nos países



capitalistes. La experiencia y planteamientos del movimiento ecoloxista estructuráu n'Europa d'hai unos años p'acá son una fonte importantísima de reflexón y programa políticu pa la izquierda consecuente. Asina, trátase de ver a la ecoloxía non como un adornu na propaganda electoral de turnu, sinón como'l Norte lóxicu d'una actividá consciente empobinada non a axustar l'ecosistema al modelu de crecimentu económicu, sinón precisamente al revés. Ello solo ye posible con una política de planificación, lo qu'enllaza directamente col modelu social y económicu que tenemos como oxetivu.

Y esa concepción socialista del ecoloxismu (o ecoloxista del socialismu) ye más posible d'iguar nel nuestro contestu nacional que n'otros marcos específicos, por mor de ser la nuestra una comunidá humana pequeña, y por eso más fácil de cohesionar y analizar conxuntamente col so entornu, ensin escaecer por ello que'l problema ecolóxicu ye global y globales han de ser les soluciones.

Yá n'otra parte d'esti documentu sullñamos que la nuestra concepción de la ecoloxía política ye crítica tanto colos planteamientos filosóficos idealistes que ven al ecoloxismu como daqué independiente de les relaciones sociales de producción, como coles corrientes de la izquierda igualmente productivistes (porque traducen socialismu por mera estatización de los medios de producción, ensin camudar nengún comportamientu nin modu de crecimentu d'esos medios), o les teoríes ambientalistes -el nomáu ecokeynesianismu- que reducen la ecoloxía a un simple conservacionismu y lexislación consistente en multar a les grandes empreses contaminantes (gastos qu'eses empreses acaben facendo pagar a los consumidores). Esta auténtica socialdemocracia de la ecoloxía nun pue significar más qu'avances parciales que nun son a resolver el problema pues nun s'atreve a dir al niciu de la cuestión, que ye'l conxuntu del modu de producción.

**46.** Nun se trata de poner como oxetivu la vuelta a un señalosu pasáu rural de subsistencia presuntamente idílico. Trátase d'avanzar, con tola experiencia científica y al traviés de la participación democrática, hacia un modelu ecolóxicu de crecimentu económicu nel que'l balance ambiental de cada actividá humana seya un principiu que guíe la economía, lo mesmo que'l balance social. Un modelu económicu con fontes enerxétiques renovables, una producción col mínimu de gastu enerxéticu y col mínimu de refugayes, siendo estes lo másimu de reciclables; una agricultura ecolóxica, menos intensiva enerxética y químicamente, y integrada nel entornu; un tresporte públicu menos contaminante, más baratu socialmente y menos gastizu n'enerxía; un consumu asentáu na calidá de los bienes y los servicios, nel cubrimientu de les necesidaes reales y que suponga un francamientu cola orxía consumista de lo superfluo y del *usar y tirar*.



Al mesmu tiempu qu'estes polítiques, la crisis ecolóxica mundial precisa tamién d'una solución gblal que pase pela redistribución de la riqueza y l'acabu de l'actual lóxica d'intercambiu comercial Norte-Sur, que ye una de les mayores fontes d'esta situación tan llaceriosa, yá que probitú y estrozu ecolóxicu suelen ser dos aspectos inevitablemente xuníos.

## POLA DEFENSA INEQUÍVOCA DE LOS DERECHOS HUMANOS

**48.** Ún de los mayores avances de la mentalidá progresista a lo llargo d'esti sieglu ye la gran sensibilidá qu'amplies capes sociales demuestren pa cola defensa de los derechos individuales y colectivos, espeyaos na Declaración Universal de los Derechos Humanos de 1948.

Dende les declaraciones de los derechos formales de propiedá, llibertá de prensa o defensa xurídica al reconocimientu de los derechos políticos (d'asociación y sufraxu, y pa tola población) y sociales (al trabayu, a la vivienda, la salú, etc.) pasó un llargu procesu de llucha del movimientu obreru escontra l'Estáu lliberal, siendo asina el reconocimientu d'esos derechos una conquista histórica de la izquierda y de toles corrientes democrátiques y progresistes d'esta dómina.

**49.** Nel procesu de consolidación y espardimientu de la conciencia na defensa de los derechos humanos, surdieron delles corrientes reduccionistes na interpretación d'ellos y del so valir políticu.

La corriente asistencialista reduz la llucha polos derechos humanos a la simple denuncia de les tortures y tratos degradantes a persones en dellos países, xeneralmente del nomáu Tercer Mundu, tapeciendo malapenes un discursu paternalista que desdibuxa l'auténticu valir de la Declaración Universal, al nun cinciar los aspectos sociales nin económicos.

La interpretación lliberal de los derechos humanos céntrase namás que nos aspectos políticos (llibertá de votu, d'asociación, etc.) ignorando a costafecha los derechos sociales (a la salú, la vivienda, al tiempu llibre, al trabayu, etc.) yá qu'estos son vulneraos de continuo nos rexímenes lliberales.

La concepción de los derechos humanos en dellos sectores de la izquierda tien la so exa nos derechos sociales, obviando los políticos, vistos como peligrosos lliberalidaes burgueses. La razón de ser d'esta concepción ye'l so compromisu colos acabantes rexímenes del Este européu y los poco tapecíospetites autoritarios de los proyectos políticos qu'esas corrientes pretenden caltener.



**50.** Pa **IZQUIERDA ASTURIANA**, la defensa consecuente los derechos humanos ye consustancial al so proyectu socialista democráticu. Entendemos a la Declaración Universal como un auténticu programa revolucionariu porque la so realización dafechu supondría un francimientu col réxime actual, yá que l'actual sistema social nun permite l'auténticu desenrolle del derechu al trabayu, a la vivienda, a la cultura, a la non discriminación, etc. sinón que la so vulneración ye inherente a esi mesmu sistema, incapaz de garantizar el so cumplimientu, magar que formen parte de les constituciones, programes y discursos políticos de turnu. Ye asina que l'espardimientu y el sofitu a la conciencia ciudadana pola defensa de tolos derechos humanos ye un llabor progresista nel que la izquierda consecuente ha de tar fondeamente enfotada al traviés del compromisu y la denuncia tanto de les vulneraciones en sí d'esos derechos como de les sos causes, lo que supón un cambiu cualitativu de l'actual visión d'esti problema y una denuncia del cinismu d'aquellos que, magar del so sofitu formal a la Declaración Universal, entienden imposible la so realización dafechu.

La defensa de los derechos humanos ta tamién en forma relacionada cola llucha escontra la discriminación de les persones. La primición de les muyeres, el racismu, l'odiu relixosu, el xovinismu, l'arrequexamientu de la xente homosexual, l' minusválido o inmigrante, suponen otres tantes violaciones de la Declaración Universal y que nos más de los casos nun son superables dafechu nel entornu cultural resultáu del sistema socioeconómicu vixente, yá que la discriminación sirve en muchos casos como escelente escusa pa tapecer contradicciones sociales más fondes, faciendo eses minoríes étniques, relixoses, sexuales, etc. el papel de paganes de les frustraciones del restu la población.

La realización y desenrollu dafechu de toos y caún de los derechos humanos solo ye posible nun contestu social, económicu, políticu y cultural que posibilite l'acabu de tou tipu de primición y alienación, esto ye, nuna democracia socialista.

## POLA SOLIDARIEDÁ ENTE LOS PUEBLOS

**51.** La solidariedá internacionalista ye una de les meyores tradiciones de la izquierda, y más en concreto, del pensamientu socialista. L'apoyu, moral, políticu y material, a toes aquelles organizaciones y pueblos que lluchen escontra cualisquier tipu de primición ye una xera na que'l pueblu asturianu foi n'abondes ocasiones emisor y receptor.

El proyectu d'**IZQUIERDA ASTURIANA** nun ye aislacionista, sinón que ye consciente de que'l nostru llabor ta enseru nuna dinámica que va muncho más



allá de les llendes d'Asturies, y más tovía en viendo que cada vez ye mayor la internacionalización y interrelación de los poderes económicos, que fai que los procesos políticos de países alloñaos de nós puean afectanos grandemente. L'internacionalismu pasa asina a ser non una actividá *humanitaria*, sinón una necesidá política. Esta concepción de la solidariedá internacionalista supón un francimientu pa col solidarismu asistencial y/o verbal, que nun va más allá de l'ayuda humanitaria o l'apocáu apoyu públicu, y una crítica del internacionalismu *d'embaxada*, que tracamundia solidariedá internacionalista col sofitu incondicional y la subordinación de l'actividá política propia a los intereses de talu o cualu Estáu presuntamente modélicu. **IZQUIERDA ASTURIANA** defínese como un partíu dafechamente internacionalista que, dende la so posturade proyectu soberanu, ye asina solidariu con tolos pueblos que lluchen escontra'l totalitarismu, l'imperialismu y cualisquier triba de primición.

**52.** La nuestra autodefinition como partíu internacionalista y solidariu ye fundamente contradictoria col patrioterismu clásicu del Estáu-nación (enforma acentuáu nos tiempos de crisis económica y que fai ver a los y les trabayadores d'otros países como competidores y non como aliaos potenciales na llucha pola emancipación) y tamién cobs vieyos prexucios nacionales, que parten del despreciu y la caricaturización de los pueblos vecinos. Al mesmu tiempu, ye incompatible col plantegamientu neolliberal de pasar del nacionalismu xovinista d'Estáu-nación al nacionalismu xovinista d'Europa Occidental, tovía más peligrosu en tanto que tiende a presentase como daqué progresista, solidariu y superador d'antagonismos nacionales, cuando en realidá lo que fai ye elevar esos antagonismos a un nivel intercontinental. Por último, la definición d'internacionalistes y solidarios tamién cinca la cuestión de la inmigración, xera na qu'Asturies tamién foi, y de xuru va ser, n'abondes ocasiones emisora y receptora. Pa **IZQUIERDA ASTURIANA** ye asturianu o asturiana tou aquel o aquella que viende la so fuerza de trabayu n'Asturies y se sienta participe na construcción d'esti país, independientemente del so llugar de nacimientu. Al mesmu tiempu, son tamién asturianos toos aquellos homes y muyeres que nes décadas anteriores viéronse obligaos, por razones económicas y/o polítiques, a marchar d'esti país y que tovía güei trabayen nos sos países receptores por caltener la so cultura y identidá asturiana. D'otru llau, ye xera obligada pa tola izquierda consecuente'l sofitu y la solidariedá colos esiliaos políticos y/o económicos d'otros países.

**53.** La defensad'un proyectu nacional, y precisamente por eso, fundamente solidariu, puede abultar como daqué raro a los güeyos d'esa izquierda que pretende tener la patente del internacionalismu y que s'escuda nel mesmu pa tapecer, les más de les veces, un inconfesable nacionalismu españolista, que parte del despreciu y l'amenorgamientu de toles cultures perifériques del Estáu, anque



hacia afuera presente una imaxe solidaria y comprometida. Esa izquierda, amás, ye una de les mayores responsables de la consolidación y l'espardimientu ente los sectores populares del patrioterismu d'Estáu-nación, los prexucios nacionales y l'euroxovinismu, quedando asina políticamente incapacitada pa exercer un papel lliberador. La izquierda sucursalista allugada n'Asturies nun ye criticable polo que tien de internacionalista, sinón polo que nun tien, que ye muncho.

Asina, la famosa contradicción dialéctica formal ente nacionalismu-internacionalismu, yá tratada n'otra parte d'esti documentu, ye daqué más que formal ente esa izquierda fetichista del Estáu-nación y enllena de prexucios grannacionales, asina como nesi nacionalismu pretendidamente d'izquierdes enfotáu nel narcisismu embelguista y que de xemes en cuando s'empapiza col discursu demagóxicu d'una solidaridá y un internacionalismu tan proclamaos al altu la lleva como poco practicaos.

## POLA IDENTIDÁ D'ASTURIES

**54.** No que güei ye'l territoriu de la Comunità Autónoma d'Asturies, y perpasando les sos llendes actuales, foi constituyéndose una manera peculiar d'adaptación al mediu y d'interpretación del mesmu, una manera de ver el mundu y les relaciones humanas, lo que constitúi una identidá étnica. Esti procesu ye dinámicu, de manera que nun ye lo mesmo la identidá asturiana de la dómina prerromana, romana, medieval, moderna, etc. aunque toes seyan fíes unes d'otres. Nun hai que confundir esto con esencialismu, sinón simplemente entendolo como'l procesu históricu que se concreta na existencia d'una identidá asturiana contemporánea compuesta por fechos culturales. Parte de la población d'Asturies asume esos fechos dende'l puntu de vista funcional (comportamientos sociales, llingua, cultura material...) y son los depositarios directos de la identidá cultural. Na sociedá actual, el procesu d'autoidentificación y pertenencia a un grupu vese reforciáu pol usu de los fechos culturales como marques d'identidá. Esti procesu ye asumíu n'Asturies por un grupu humanu que nun tien necesariamente que coincidir col anterior, pero que xunta elli ye tamién depositariu (indirectu) de la tradición.

La población actual d'Asturies ye polo tanto heriede d'una identidá cultural propia. Pero ye evidente que en toa sociedá estremada en clases sociales dase siempre la coexistencia de dos cultures o formes d'entender la cultura nacional: la de la clase dominante y la de la clase dominada, tanto na cultura material (arquitectura, ferramientes, artesanía...) y la non material (folklore, llingua, mitos...), toes dos espresiones del mou de vida de les clases productores, habiendo tamién unes formes ideolóxicas (la relixón, los tabús sociales, la concepción patriarcal de la familia, la pirámide social...) que son les qu'estructuren



el discursu dominante empobináu a tapecer y da-y coherencia a una realidá nacional de clases sociales contradictories.

Nel casu asturianu, asumimos un conceptu de cultura nacional prácticamente identificable dafechu col de cultura popular, yá que la nuestra burguesía, consecuentemente cola so falta d'autonomía económica, refugó dafechu de la llingua y la cultura asturiana, renunciando a una ideoloxía propia, y asumiendo voluntariamente la llingua castellana y la cultura españolista. Asina, la élite económica y política d'Asturies nun tien un discursu cultural propiu, sinón ún subsidiariu de la metrópoli y resignáu a exercer de periféricu (lo mesmo que la estructura económica o l'abanicu de fuerces polítiques). Poro, el discursu cultural güei dominante n'Asturies ye la plasmación ideolóxica tanto de l'alienación de clase como de l'alienación nacional que sufre'l conxuntu del pueblu trabayador asturianu.

**55.** Nesti contestu, la llucha cultural pasa a ocupar un papel enforma importante, más inclusive que n'otres sociedaes nacionales más conscientes de só y con una clase dominante con un discursu cultural propiu. Asina, el procesu de dignificación de la cultura autóctona muestra un doble calter progresista: permite combatir los prexucios ideolóxicos de la clase dominante ente la población trabayadora y sirve pa iguar un discursu cultural específicu, qu'identifica al pueblu trabayador cola nación, al ser ésti la clas productora y fonte de la riqueza del país. Pero ye tamién progresista porque'l fechu de que'l pueblu trabayador d'esti país s'autoreconozca como asturianu ye condición *sine qua non* pa iguar un proyectu políticu alternativu que recueya los intereses y aspiraciones d'esa clase social. Un pueblu brétigu, consciente de soó y de la so fuercia, ye muncho más revesosu de dominar y xuncir a una realidá inxusta. Por eso históricamente, nel procesu de criación de los Estaos-nación y de los grandes mercaos nacional-estatales, intentóse, dende les instancies de los poderes centrales, homoxeneizar a toles poblaciones xuncies al so dominiu, reprimiendo, con una brutalidá variable según los casos, a toles minoríes (lingüístiques, relixoses, étniques...). Esti procesu vese güei amplíáu a nivel mundial, por mor de la espansión de la civilización europea occidental y norteamericana a tol mundu y la imposición progresiva d'unos mesmos vezos consumistes que cinquen a tolos aspectos de la vida pública y privada de les persones. N'oposición a esto, defendemos la identidá de los asturianos y asturianas como contribución al mosaicu cultural universal, y por ello con valir en sí mesmu. Nesti sen, llucharemos escontra l'asimilación cultural y l'aculturación, y fadrémoslo tamién por velos como procesos de dominiu ideolóxicu, que suponen l'aniquilamentu étnicu d'Asturies, y que traeríen una mayor inadaptación de la población al mediu.



**56. IZQUIERDA ASTURIANA** trabayarà pola dignificación de los fechos culturales, por espardebs y difundilos ente tola población asturiana como mediu pa reforciar el sentimientu de pertenencia a un grupu étnicu, dinamizador social de muncha importancia y eslabón pa la integración del individu u nel conxuntu de la humanidá. Puxará pol caltenimientu dinámicu de la identidá asturiana. Esta apuesta pola dignificación de la nuestra cultura popular implica qu'èsta dexa de tar arrequexada nel so propiu país y pase a ser la dominante nel mesmu, talantando por esto non la imposición totalitaria de la llingua y toles manifestaciones culturales propies, sinón la concienciación del conxuntu'l país del valir de la nuestra cultura autóctona, de la importancia de la so conservación, usu y espozigue pa dexar a les xeneraciones venideres, y de la so oficialización nos poderes públicos y mui especialmente na alministración, na educación y nos medios de comunicación. Trátase d'algamar la cotidianeidá de la llingua y la cultura asturiana nel conxuntu de los nuestros conciudadanos y conciudadanes, invirtiendo la situación actual na que amplísimos sectores sociales ven esto como daqué ayeno o desconocíu. La llingua asturiana constitúi asina un elementu fundamental, porque axunta'l carácter funcional y el de marca étnica, y porque ye'l mediu pel que mos llega la nuestra esperiencia histórica y los nuestros valores sociales. **IAS** tamién habrá de tomar conciencia de llingua minoritaria del asturianu, polo qu'habrán d'iguase los mecanismos amañosos que garanticen la so supervivencia.

Esa apuesta ha de dir muncho más allá de les meres declaraciones verbales de sofitu, sinón qu'ha d'iguase fundamentalmente al traviés del usu davezu por tolos axentes sociales.

**57.** Esi procesu de recuperación y dignificación de la llingua y la cultura asturiana ha de dir paralelu a la oposición y crítica del cosmopolitismu afaláu por delles minoríes oligárquiques, qu'apuesten, en nome d'un presuntu petite pol mestizaxe, pol esancie d'afechu de les cultures minoritaries y minorizaes nes manes de les más fuertes, pretendiendo imponer un mesmu patrón cultural a tolos pueblos de la Tierra (patrón, per otra parte, solo aplicable a pequeñísimos élites d'esos pueblos, pues la cultura d'un país nun ye solo resultante de los sos condicionantes sociales y políticos, sinón tamién xeográficos, relixosos y inclusu climáticos, que, evidentemente, son estremaos en toles partes del mundu). Esta crítica del cosmopolitismu nun implica, de nenguna manera, el menospreciu a otros pueblos nin la concepción de la cultura propia como daqué acabao, perfecho, inmutable o impermeable a otre influencias culturales, sinón que parte d'entender al mestizaxe, nel casu de dase, como un procesu natural, non impuestu, y que contribúi a arriquecer la vida de los pueblos y non a emprobecelos nin a uniformizabs, pero somos conscientes de qu'esos procesos, siempre valorables, solo puen dase cola preservación de les identidaes estremaes. Pa qu'èsto seya



dable, ye preciso arrequezar toa idega de cultures superiores y inferiores, y asumir, ensin complexu nengún, que la llingua y la cultura asturianas, lo mesmo que padrimoniu del nuestro país, sonlo tamién, como toles otres cultures, de la humanidá.

## POR UNA NUEVA ÉTICA SOCIAL.

**58.** Énte los revesosos momentos pelos que ta pasando Asturias, paezmos imprescindible una inyección de moral al conxuntu de la sociedá, y mui especialmente, a les instituciones. La llamurga na que la clas política ta fundiéndose ye tala que llega a chiscar al conxuntu de los ciudadanos y ciudadanes, al sofitar un conformismu y un desentendimientu cómplice cola corrupción y el lladrociniu institucionalizáu.

Entendiendo que la necesaria renovación y redefinición del discursu socialista pasa, anantes de nada, per una rexeneración moral y por otres formes de facer política y viendo a esimodelu social a construyir como daqué más qu'una mera estructura económica, apostamos por un nuevu códigu de valores que se correspuenda con esa nueva sociedá por facer.

Trátase asina de ver que pa qu'una estratexa de calter democráticu y tresformador cuaye ente la xente y legue a tener una proyección de mases, faise preciso recoyer y reformular los aspectos más progresistes y solidarios de la cultura nacional, lo que tien muncho que ver col combate pola dignificación de la cultura autóctona. La llucha escontra l'oportunismu, el desentendimientu, la inorancia, l'aislacionismu y l'egoísmu ye paralela al afitamientu paulatinu d'una nueva ética, más solidaria, llibre y democrática, faciendo yá güei la mentalidá que seya a construyir mañana una sociedá más xusta. Esta forxa de la moral del productor ye condición indispensable p'avanzar nel camín de socialismu, entendiendo a ésti como l'autogobiernu de los pueblos, que será imposible d'afechu con una población educada nos valores del individualismu, la insolidariedá o el consumismu.

**59.** Poro, l'afitamientu paulatinu d'una nueva ética social habrá de facese n'oposición constante colos valores dominantes, ente los que sobresalen un *darwinismu social* que mos lleva a la *lei de la selva* y al esguarnimientu social, y una doble moral vixente na clase política pero tamién en amplísimos sectores sociales, que mos lleva a la cotidianeidá de la hipocresía y la indignidá.

Esta oposición a los valores del discursu dominante ha de vese como daqué permanente y irrenunciable, yá que l'asunción del conformismu lleva



irremediamente a la vuelta p'atrás nesos espacios algamaos, viéndose esto claramente nel casu asturianu cola autorrenuncia moral de ciertos partíos y organizaciones históriques de la izquierda.

**60.** La nueva ética social pola qu'**IZQUIERDA ASTURIANA** apuesta tien una doble dimensión, pública y privada, individual y colectiva. Trátase de la defensa y la práctica permanente y consecuente d'unos principios na vida pública y na privada, pa fuxir de toa doble moral, y tanto nel tarrén individual como nel colectivuu, siendo asina'l partíu la ferramienta al traviés de la que dir esparriendo esi códigu de valores en toles estayes de la vida social. Esto llévanos a la necesidá d'iguar un discursu coherente que desenrolle una acción política aborde colos principios, por contra de como suel ocurrir col pragmatismu dominante, cuando la teoría pasa a ser la xustificación a posteriori de l'acción política. Asina, el labor políticu ha de dir empobináu hacia la xeneralización de les idegues, y non les idegues en función de l'acción política desenrollada.

La práctica d'una ética colectiva que nun coarte la llibertá individual, y l'apuesta pola solidariedá, la responsabilidá, l'austeridá y la coherencia, la moral del productor, en definitiva, ye una xera que va muncho más allá de les declaraciones xenerales, sinón qu'implica la conocida idega de predicar col exemplu, sometiendo a xuiciu constante a **IZQUIERDA ASTURIANA** non solo poles sos declaraciones y manifiestos públicos sinón, más que nada, pola práctica diaria individual y colectiva de la so militancia.

## CONCLUSIÓN: UNA ESTRATEXA POPULAR.

**61.** De lo anantes espuesto dedúzse que la estratexa d'**IZQUIERDA ASTURIANA** ta alloñada de tou tipu de mesianismu o concepción elitista de l'acción política. Esto ye asina porque pal desenrolle dafechu d'estos ambiciosos oxetivos estratéxicos ye imprescindible la participación masiva y consciente de la mayoría de la población, siendo la conquista de los corazones l'enfotu cimero del nuestro labor políticu.

Nun se trata d'esperar a *tener el poder* pa facer les coses, sinón de da-y el protagonismu a la sociedá, faciéndola exercitar esipoder lexítimu de só dende la basa. Poro, entendemos que l'autodeterminación colectiva del pueblu asturianu ye imposible ensin l'autodeterminación individual llibre y consciente de tolos ciudadanos y ciudadanes; que la construcción d'una democracia socialista ye consustancial a l'autoxestión del conxuntu de la sociedá; que'l logru d'un modelu ecolóxicu de crecimentu económicu nun ye vidable ensin cambios cualitativos bien importantes nos vezos de consumu y de comportamientu pa cola Naturaleza de la



mayoría de la población; que l'aplicación dafechu de los derechos humanos solo ye dable si partimos del conocimientu y la conciencia colectiva d'esos derechos; que la solidariedá ente los pueblos va xunida al esanicie de toa triba de prexucios nacionales y d'estremación ente cultures superiores y inferiores; que la dignificación de la llingua y la cultura asturiana ta inevitablemente vinculada al compromisu del pueblu asturianu con esa cultura de só; que tolo anterior, en definitiva, nun ye a realizase ensin una sociedá civil fuerte, con una nueva moral cívica y consciente de les sos obligaciones y derechos.

Poru, p'algamar esos oxetivos ye necesario partir de la concienciación popular, diendo al raigañu de les coses -y siendo, por ello, un partíu radical nelsen más puru de la palabra- y refugando tanto de la demagoxa masimalista, que lleva a la impotencia política y a la desmovilización d'esos sectores previamente seducíos poles promeses fáciles, como del espeyismu electoralista, que lleva al elitismu y reduz el componente de la participación popular a la mera presencianu mítines y nes votaciones.

Ciertamente, ye esí'l camín más revesosu y tardiegu, pero ye, tamién, el más seguru. Y ye tamién el que precisa, amás d'un Norte definíu -los oxetivos estratéxicos- d'un llabor políticu fundamente apobináu na realidá diaria, y d'un modelu de partíu que seya a empobinar esi llabor políticu hacia'l llogru d'esos oxetivos finales. En definitiva, una estratexa popular precisa d'una praxis popular y d'un partíu igualmente popular pa ser a tar al altor del so voluntariamente asumíu papel históricu.



### **III. Praxis política y modelu de partíu.**

#### **TÁCTICA Y ESTRATEXA.**

**62.** Del análisis concretu de la nuestra realidá concreta surden les llinies d'actuación y el modelu de partíu necesarios nesti momentu p'algamar bs nuestros oxetivos. Eses llinies d'actuación pasen per definir concretamente: **a)** cuál os son los pilancos que tien la sociedá asturiana p'avanzar, **b)** qué propuestes tenenos pa derromper esa situación y, **c)** con qué fuercies vamos intentar dibxuar un proyectu de país más xustu, llibre y solidariu.

**62.1.** No que cinca a lo primero, eses torgues son, fundamentalmente, un marcu económicu en decadencia, caracterizáu pola anulación d'afechu de la empresa pesada pública, les sos empreses ausiliares, l'amenorgamientu hasta mínimos del campu y la pesca y l'ausencia crónica d'unes bones infraestructures comunicatives; un procesu d'esgonciamientu social por mor del éxodu zural, el paru masivu, la corrupción, l'espardimientu la drogodependencia y el fracasu del modelu educativu, lo que traidarréu una auténtica crisis de valores, manifestada nel procesu d'aculturación del país; un marcu xurídico-políticu claramente



insuficiente, con una Constitución inmovilista, un Estatutu d'autonomía ensin competencias, una Xunta Xeneral ensin capacidá lexislativa real y un Gobiernu autonómicu que refuga de les sos obligaciones pa col pueblu que lu escoyó; y un mapa políticu domináu pol sucursalismu y l'oportunismu, espeyáu nunes fuercies polítiques ensin proyectu específicu p'Asturies y enfotaes en caltener la so base electoral al traviés de l'anestesia política de la población.

**62.2.** Delante esa situación, les nuestres propuestas han de dir empobinaes hacia una redefinición del marcu de relaciones económicques actualmente vixente, cola xestión por parte de les instituciones asturianas de los recursos económicos del país, la potenciación d'una economía mixta na que'l sector públicu y les cooperatives xueguen un papel central, con especial precuru pola conservación del mediu ambiente, y una política fiscal controlada dende Asturias; una riestra de reformes sociales como la protección de los derechos llaborales, la democratización del sistema educativu y los medios de comunicación o la reforma sanitaria; una reforma institucional que contemple un marcu d'autogobiernu real, una nueva llei electoral y de financiación de partíos y la criación de mecanismos de democracia más directa como los referendum vinculantes y les iniciativas lexislatives populares; una integración rexonal del país, pa impedir l'arrequexamientu de les comarques menos poblaes o puxantes económicamente; y una apuesta definida pola normalización de la llingua y la potenciación de toles demás manifestaciones de la cultura asturiana.

**62.3.** Pa ser a dar esos pasos, les nuestres alternativas han de diren tres planos, como son, nel tarrén políticu, la collaboración, nos niveles que dicte la situación, con toles fuercies polítiques que defendan un proyectu asemeyáu; no que cinca a los movimientos sociales yá esistentes, trátase d'incorporalos a esi proyectu dientro del so ámbitu específicu; y, n'otres manifestaciones de la sociedá civil, de favorecer el so espoxigue organizativu y políticu y averales a esi procesu unitariu.

Esta triple dimensión de la estratexa d'**IZQUIERDA ASTURIANA** no que cinca a les fuercies polítiques y sociales interesaes n'avanzar na democracia precisa de fondos estudios de la realidá económica y social del país, pa ser a caltriar qué sectores sociales puen ver como beneficiosa una salida nacional a la crisis del actual modelu.

**63.** Ser a dibuxar una táctica y una estratexa alcordes coles desixencies del momentu que vivimos, dándo-y un conteníu programáticu claru, pasa,



fundamentalmente, por tres etapas:

**63.1.** A curtii-mediu plazu, trátase d'afitar a **IZQUIERDA ASTURIANA** como proyectu autónomu, con presencia propia na realidá social, ensin fuxir con ello de la collaboración con otres organizaciones de calter asemeyáu, collaboración que será más o menos estable y fonda según dicten les circunstancies.

**63.2.** A mediu-llargu plazu, el llabor políticu d'**IAS** dirá empobináu a la igua d'un ampliu frente social y políticu de puntos mínimos que ponga los pegollos pa un auténticu desenrollu autónomu del país.

**63.3.** A más llargu plazu, l'oxetivu será estructurar un bloque social alternativu pola soberanía nacional y la democracia radical, que sería la continuación lóxica del procesu d'acumulación de fuerces precedente.

Esta concepción de los plazos nun implica, de nenguna manera, entendelos como elementos aislaos unos d'otros, con grandes francedures al pasar d'una etapa a otra. Por contra, l'afitamentu y espardimientu organizativu y políticu d'**IZQUIERDA ASTURIANA** pue dir paralelu a la igua d'esi proyectu de puntos mínimos, lo mesmo qu'esi procesu nun implica dexar pa más alantre la defensadel proyectu a llargu plazu y el programa másimu. Trátase, cenciellamente, de pescanciar en cada momentu cuál ye'l nivel de conciencia de la opinión pública pa tener una praxis coherente que puea direnanchando y afondando nesa conciencia colectiva.

**64.** Los pegollos sobre los que ha d'afitase y esparde se'l proyectu d'**IAS** ente la sociedá asturiana han de ser los que vienen darréu:

**64.1.** En primer llugar, una gran capacidá d'análisis teóricu, históricu y socioeconómicu. Análisis teóricu pa ser a interpretar y adaptar a la realidá asturiana tou esi pensamientu padrimoniu de la izquierda mundial; análisis históricu pa ser a conocer la nuestra realidá y el porqué de la mesma; análisis socioeconómicu pa ser a proponer alternatives válides y vidables na Asturias d'anguaño. Ye tamién necesario esa capacidá analítica pa fuxir del aislacionismu y la creencia infantil de que la nuestra situación ye única nel mundu y que lo qu'ocurre fuera de les nuestres llendes nun mos afecta. Y tamién pa ser a talantar esto como un proyectu global, esto ye, asumir, dende la nuestra condición d'asturianos, la necesidá de desplicar el nostru marcu específicu nel contestu internacional, y la concepción d'esi proyectu como daqué más qu'una cenciella alteración de les actuales polítiques



culturales o de la terminología institucional, sinón como una alternativa en toles fasteres de la sociedad asturiana.

**64.2.** Esa capacidá analítica tien de concretase nel nuestro marcu específicu: Asturias. Ye lo que se conoz como *análisis concretu de la realidá concreta*. Esto nun quier dicir, de nenguna manera, que fagamos abstracción de los marcos más amplios nos que mos desenrollamos (Estáu Español, Unión Europea...) sinón que ye de la nuestra realidá diaria dende onde tien de salir la solución a les nuestres contradicciones y non esperara que vengan d'afuera les recetas pa la nuestra situación.

**64.3.** Amás d'esa capacidá d'análisis y d'esa voluntá d'asumir el nuestro marcu nacional fai falta'l maduramientu políticu necesariu pa toa acción política. Yá valió de personalismos, conspiraciones, sectarismos, encerramientos inútiles y toa mena de zunes y xeitos propios de movimientos políticos herméticos, que faen asumir a la izquierda nacionalista una dinámica de *guetto* que mos alloña de la sociedad asturiana. Y yá valió tamién d'esperimentos presuntamente unitarios ensin bases polítiques consolidaes y durables. Hai d'algamar la unidá pero tamién hai de saber caltenela.

**64.4.** Pa ser a desenrollar una praxismínimamente coherente dende una perspectiva d'izquierdes, hai que tener una política clara nos movimientos sociales. Hasta agora, vemos como hai una dixebrá evidente ente los movimientos sociales de calter cultural y llingüísticu, cuasi l'únicu ámbitu d'actuación de la izquierda nacionalista, y tolos demás (movimientu de solidaridá internacionalista, ciudadanu, educativu, ecoloxista, polos derechos humanos, etc.) que paecen como propios del restu de les fuerces d'izquierda. Pa nós ye imprescindible acabar dafechu con esto, yá que si realmente lluchamos por iguar un proyectu políticu propiu p' Asturias, esi proyectu pasa per tener polítiques coherentes pa y en tolos movimientos sociales, yá que toos trabayen temas qu'afecten directamente a la nuestra realidá social. Y tener política coherente hacia ellos, y nellos, nun significa facer un llamáu al masuñamientu partidista de los mesmos, sinón trabayar y facer que furrulen, asina como averalos a una estratexa coherente cola realidá nacional d' Asturias.

Casu aparte merez el movimientu sindical. Hasta agora nun hebio nenguna política sindical consciente y continuada empobinada a algamar un viraxe estratéxicu hacia'l nacionalismu nes centrales sindicales, quedando too namás que n'honráu voluntarismu de los menos y palos de ciegu de los



más, salvo excepciones. **IZQUIERDA ASTURIANA** apuesta por un mayor compromiso con y en el movimiento sindical, que ya en este momento es uno de los mayores preseos de los trabajadores d'Asturies pa encarar la crisis.

**64.5.** No que cinca a la cuestión institucional, **IAS** quiere refugar tanto del maximalismo anti-institucional como del espeyismu parlamentariu. Si somos a talantar les instituciones representativas al traviés de les que s'articula güei la política asturiana (conceyos, Xunta Xeneral y parlamentos español y européu) non como fines, como oxetivos en sí mesmos, sinón como medios, como un foru más nel que desenvolver la nuestra acción política, si realmente somos a ello, taremos dando'l pasu definitivu pa superar l'oportunismu electoralista y el xeitu testimonialista y presuntamente radical.

**64.6.** Si pretendemos facer usu de tolos foros y preseos de participación política que podamos, tien de ser pa facer una política non solo guapa, sinón tamién útil. Esto ye, ser a presentar alternativas a tolos niveles y en toles temes, a curtiiu, mediu o llargu plazu, y non posponiendo les alternativas a un futuru alloñáu y presuntamente maravillosu nel que too será perfeutu. Esto tien muncho que ver con esa concepción global de la qu'anantes falábemos, con esa construcción d'una izquierda nacional p'Asturies. Ye, en definitiva, la normalización política de la praxis nacionalista nesti país.

## UN PROYECTU DE PUNTOS MÍNIMOS.

**65.** Ariendes de los oxetivos cimeros qu'**IZQUIERDA ASTURIANA** defende, paezmos enforma importante facer una concrección táctica d'ellos, un programa mínimu que guíe la nuestra acción política inmediata. Queremos dicir con esto que nun tenemos vagar n'almidir cuales son les nuestros aspiraciones finales, pero qu'hai tamién que tener en cuenta el grau de conciencia y la correlación de fuerces que tien güei la sociedad asturiana. Si presentamos, equí agora, el nuestro programa másimu (soberanía nacional, democracia socialista...) como la nuestra plataforma política inmediata, taremos perpasando el nivel de conciencia del pueblu asturianu y esos oxetivos nun serán almitíos. Pero si sabemos presentar propuestas realistes, oxetivos concretos que seya posible algamar, una vez llograos podremos seguir avanzando, y taremos popularizando el nuestro programa, faciendo que la sociedad asturiana lu asuma como daqué necesario y impostergable.

**66.** Esi programa mínimu que puea servir como oxetivos concretos alrededor



de los que movilizar a la mayoría del país, concrétese en siete puntos que son los pegollos sobre los qu'algamar los nuestros oxetivos estratéxicos:

**66.1.** Criación d'un marcu d'autogobiernu dafechu, que supere l'actual marcu constitucional. Paezmos que la primer condición pa un desenrollu nacional mínimamente autónomu ye la de tener un marcu xurídico-políticu afayadizu, basáu na libre xuntura de les partes y non na imposición d'un Centru que cede graciosamente competencies. Esa necesidá de superación del actual marcu constitucional ye'l resultáu lóxicu del so agotamientu, yá que la insatisfactoria capacidá competencial del *Estáu de les Autonomíes* ye tala que nun ye posible'l so desenrollu dientro del actual contestu legal. Arriendes d'esto, ye condición indispensable pa un mínimu autogobiernu el control y la xestión de les fontes económiques, pa lo que ye preciso un concertu económicu col Estáu, la criación d'un Bancu públicu asturianu y el control de la empresa pública asitiada n'Asturies.

**66.2.** Midíes económiques progresistes, empobinaes a algamar una economía mixta con un importante sector públicu, el sofitu a les cooperatives, especialmente nel mediu rural, y que torgue l'allugamientu n'Asturies de les multinacionales; al empar, ye indispensable la xestión dafechu de la Seguridá Social, oponiéndonos a la privatización de la sanidá y del sistema de pensiones. Ye tamién necesaria una reforma llaboral que-y ponga acabu al trabayu precariu y a la sobreesplotación de la xente mozo, y una política de planificación de la economía, pa xestionar de modu eficazos recursos naturales y dirixir un plan de reindustrialización d'Asturies.

**66.3.** Una política medioambiental seria y non especulativa, que controle'l turismu, puxe pola integración rexonal del país, torgue l'espardimientu de les empreses papeleres y químiques altamente contaminantes ponga especial acentu na construcción d'empreses de reciclaxe, esparda nuevos vezos de consumu y potencie los tresportes.

**66.4.** La defensade los derechos democráticos, que pasa, ente otres coses, por una reforma del sistema electoral y de la financiación de los partíos, que-y dea igualdá d'oportunidaes a toles opciones polítiques; una reordenación y democratización de les fuerces policiales; una nueva llei de fuega, que nun restrinxa esi l'xítimu derechu; y una descentralización del poder políticu asturianu, pa nun repetir l'esquema central de centru y periferia.

**66.5.** La solidariedá colos pueblos, al traviés tanto d'una peramplia



rede social de solidariedá, como de l'ayuda, dende los poderes públicos, al crecimentu de los países del Sur, con fondos xestionaos poles organizaciones non gubernamentales, pa facer de la solidariedá non una actividá caritativa, sinón un llabor de claru calter progresista nel que los protagonistes han de ser siempre los ciudadanos y ciudadanes. Al mesmu tiempu, ye necesario defender el derechu d'asíu pa toa triba d'esiliaos políticos y económicos.

**66.6.** La dignificación de la cultura asturiana, asina como la so normalización social dafechu. Pa ello, fáise necesario una llei d'oficialidá de la lingua asturiana en toles estayes de la vida pública y una política coherente de normalización; la defensa d'una educación pública, gratuita y laica, dende la escuela primaria a la Universidá, qu'ha de cumplir la función de faru cultural del país; la criación d'una radiotelevisión pública asturiana y d'una amplia rede cultural (musical, folklórica, deportiva, etc.) asequible pa tolciudadanía, y la defensa d'unos nuevos vezos de consumu que superen l'actual concepción del tiempu llibre na que la población nun ye sinón mera espectadora pasiva. Fai falta tamién una política cultural que-y ponga acabu al antagonismu campu-ciudadá y a los prexucios sobre'l mundu rural, asina como a toa triba de cantonalismu.

**66.7.** L'espardimientu d'una nueva ética social, tanto nes instituciones como nel conxuntu de la sociedá, pa lo qu'habrá d'esaniciar toa triba de lladrochíu y tracamundiú ente l'interés xeneral y el priváu; recuperar el valir de l'actividá política como un xeitu d'entrega y xenerosidá, a la escontra de como ye yá vezu ente la clase política; una llei d'incompatibilidaes ente cargos públicos y actividá profesional privada, asina como la lexislación d'un tiempu másimu d'exerciciu de cargos electivos; la educación de la población nos valores de la solidariedá, la tolerancia y la xusticia, puxando por una mayor participación ciudadana na actividá política y la máxima tresparencia na xestión de los fondos públicos.

**67.** La concreción d'esti programa puede -debe- superar les llandes organizatives d'**IAS** en tanto que ye susceptible de ser asumida por otres opciones polítiques y sociales. Esto ye, en viendo l'actual coyuntura histórica na que mos topamos, d'agresión xeneralizada en toles fasteres, entendemos que ye posible, y necesario, la construcción d'un amplísimu frente político-social, qu'axunte, nesi proyectu de puntos mínimos, a tolos sectores sociales oxetivamente perxudicaos pola crisis, y que ven como necesidá impostergable un procesu de rexeneración económica, social, política, cultural y ética dende una óptica nacional y progresista. La concreción política qu'esta comuña d'intereses puea tener nun ye cuestión pa



falar equí. Podrá ser un frente de calter políticu-electoral o namás qu'una plataforma d'organizaciones sociales y polítiques o podrá haber otros niveles de vinculación. En tou casu, fáise necesario estremar la igua d'esi bbque social alternativu cola construcción d'**IZQUIERDA ASTURIANA** como proyectu autónomu. Estremación ésta que fai de los dos procesos daqué non contradictorio, sinón claramente complementario. Asina, faciendo **IAS** taremos ayudando a articular la sociedá asturiana, y, consolidando esifrente ampliu de puntos mínimos, taremos popularizando el nuestru programa y dando los primeros pasos hacia'l so llogru.

D'otru llau, ye necesario sulliñar otra vuelta qu'**IAS** curiaráse muncho de nun rebasar el nivel de conciencia política de la sociedá, y qu'intentará dir siempre un pasu per delante d'esi nivel y non milenta. Asina, si somos a llograr les másimas competencias, inclusive dientro d'esti escasu marcu llegal, taremos avanzando hacia la nuestra soberanía; si-y ponemos llendes al ladrocinu institucionalizáu, taremos algamando l'afitamientu progresivu d'un nuevu códigu de valores; si mos plantegamos oxetivos concretos, como preseos pa seguir avanzando, y non como fines en sí mesmos, taremos poniendo los sofitos pa la consecución de bs nuestros oxetivos cimeros.

## EL MODELU DE PARTÍU.

**68.** P'algamar unos oxetivos colectivos, y especialmente unos oxetivos tan ambiciosos como los nuestros, fai falta una ferramienta igualmente colectiva cola qu'incidir na sociedá: el partíu. Partíu que nun ye nada en sí mesmu, sinón que ta al serviciu d'unos oxetivos que tienen unos homes y muyeres igualmente concretos, polo que ta nuna evolución constante. Nun esiste asina una idega del partíu pa siempre, sinón que tien de ser una concepción enraigonada siempre coles situaciones concretes que van xenerándose en toa llucha social y política. Esta idega del partíu-ferramienta de tresformación social ye la de la llibre xuntura de les voluntaes d'homes y muyeres que, al traviés d'esi actu de libertá que ye la militancia nun partíu d'izquierda, empiecen a ser llibres porque asumen voluntariamente'l ser elementos activos na tresformación social y na recuperación nacional. Al mesmu tiempu, un partíu que nun ye un fín en sí mesmu nin tampoco una Ilesia o una relixón, con dogmes y verdaes úniques y absolutas, sinón un partíu laicu, namás que depende de sí mesmu y elso futuru tará condicionáu polos sos aciertos y errores na xera de llevar a bon puertu esi proyectu de progresu.

**69.** Yá n'otra parte d'esti documentu diciémos qu'**IZQUIERDA ASTURIANA** yera un partíu popular. Al diciresto nun negamos el calter de clase del partíu, sinón que, refugando de tou mesianismu, perafitámonos na nuestra



voluntá de ser la espresión política de tolos sectores populares que teanen fotoas na tresformación de la sociedad, y con unos intereses que coincidan con esa tresformación. Asina, el nuestro conceptu de trabayador ye'l de tou aquel o aquella que vive del so trabayu y non del ayenu, tanto si ye obreru industrial como campesín, pescador, funcionariu..., sectores qu'axuntamos baxo'l términu de Pueblu Trabayador. Poro, **IZQUIERDA ASTURIANA** defínese como un proyectu políticu de les clases trabayadores o del pueblu trabayador, porque queremos facer d'estos sectores los protagonistas de la nuestra sociedad.

**70.** Y siendo un partíu qu'aspira a ser la espresión política de la gran mayoría de la sociedad, surge la cuestión de si pretende ser un partíu de mases o de cuadros, problema ésti enforma discutíu ente la izquierda.

Históricamente, el partíu de cuadros tuvo'l so orixe nes necesidaes de la llucha clandestina, y taba formáu por militantes avezaos, con grandes conocimientos teóricos y muncha iniciativa política. Desgraciadamente, si nun se ye a tener unes relaciones estables col conxuntu de los movimientos populares, los partíos de cuadros acaben cayendo nel esencialismu, l'elitismu y el mesianismu, yá que, asina como los individuos producen depresión y esquizofrenia cuando s'aislen de la xente, los partíos políticos reproducen los mesmos esquemes cuando s'aislen de la sociedad, acabando asina por dixebrar la teoría de la práctica y diciendo coses que nun tienen nada que ver cola realidá, lo qu'afonda tovía más esi aislamientu. Resultáu bien poco prestosu d'esta forma organizativa foron bona parte de los partíos d'estrema izquierda d'Europa Occidental, auténtiques sonsañes de lo que pretendíen ser.

Pero tamién los partíos de mases, modelu organizativu más davezu na Europa Occidental pa los partíos d'izquierda, amosaron zunes enforma dañibles, como son el seguidismu acríticu de la basa respectu de la estructura dirixente, xerarquizada y burocratizada, asina como una cierta tendencia al pragmatismu, l'oportunismu y l'electoralismu na actividá política. Preba d'esto son los partíos socialdemócrates y bona parte de los PCs oficiales, que dexeneraron en mastodóntiques estructures burocrátiques cola participación institucional como eixa central y cuasi única de la so actividá.

**71.** Inclusive viendo los riesgos qu'estes dos formes tienen, **IAS** apuesta, na actual situación social y política del país, por construir un partíu de mases. Partíu de mases nun solo nel sen de ser munchos, sinón tamién nel de ser un partíu que tien los nicios fundíos dientro los sectores sociales que formen el cuerpu, esto ye, una relación constante con tolos sectores que puean ser incorporaos a un proyectu de tresformación social. Esta condición ye lo que



permite pescancar lo que vien de la sociedad, analizo, elaboraloy devuelvo a esa sociedad, yá que'l partíu nun ta solo pa recibir infomación, sinón pa tresformala en ferramienta d'acción política.

Y esa acción política nun ye solo protestar o sopelexar o facer propaganda, sinón dir xenerando hexemonía pa que la clase trabayadora, el pueblu organizáu políticamente, puea llegar a ser fuerza de gobiernu y, poro, ser a organizar la economía, la sociedad, tola vida nacional, llogrando asina un nuevu consensu que sustituya al que la burguesía dominante iguó durante tou esti sieglu na Europa Occidental. Trátase, en definitiva, de sustituyir un bloque históricu por otru, y eso solo ye a facese con unes grandes organizaciones sociales y polítiques nas que tea estructurada la mayoría de la sociedad civil, inclusive asumiendo tolos riesgos de burocratismu y oportunismu electoralista, que en tou casu son más reversibles que los de convertise nuna secta de mesíes y *caderalgos* en filosofía política.

**72.** La cuestión del calter del partíu ta mui vinculada a la relación colos movimientos sociales. ¿Dirección o interlocución? ¿supremacía o subordinación? **IZQUIERDA ASTURIANA**, na so llínia de procesu d'acumulación de fuerces pa xenerar una nueva hexemonía, va trabayar pola autoorganización de la sociedad civil, especialmente de los y les trabayadores y los sectores sociales marxinaos y amenorgaos, pa que tengan la capacidá de decidir el futuru del país, tanto al traviés de la democracia política como de nuevos órganos de control y xestión de la vida económica y l'actividá social. Nesa estratexa, tienen especial importancia los movimientos sociales, movimientos sociales que, caún na so estaya, desenrollen un labor específicu que, dientro d'una estratexa xeneral, ayude a xenerar una mayoría nacional que dirixa un procesu de cambios al traviés del enanchamientu de la democracia y les sos formes d'exercela. El papel qu'un partíu ha de xugar nesiprocesu ye una cuestión importantísima. Un partíu que pretenda dirixir la llucha política y inclusive un procesu de cambios sociales, tien d'exercer el papel de sintetizar los aportes d'esos lluches y esos movimientos sectoriales nun proyectu alternativu global. Y nun basta con recibir esos aportes, sinón devuelvelos a los movimientos sociales intentando influir nellos y na so estratexa. Esto nun significa, de nenguna manera, nenguna triba de masuñamientu partidista nin de desembarcu nos sos órganos de dirección, sinón puxar porque esos movimientos tengan una perspectiva xeneral de la situación del país y del papel que pueden y deben xugar nuna alternativa más amplia. Poro, nun se trata de ver al partíu como un simple amiestu de militantes nos movimientos sociales, sinón como una ferramienta que dea una visión global de la realidá y asina puea actuar pa cambiala, exerciendo, nesi sen, una dirección política.

**73.** El papel de los movimientos sociales y la so relación colos partíos ye



una tema fundamente relacionada cola cuestión de la vanguardia. Una de les zunes más dañibles ente ciertos corrientes de la izquierda foi la d'autonomase vanguardia de too y de toos, sulliñando asina el calter protagonicu que la so organización debería xugar nun procesu de cambiu social. Llamentablemente, esi honor autoconcedíu solía dir acompañáu d'un certu mesianismu y complexu de predestinaos pola historia que, al enfrentase a asemeyaes pretensiones d'otres organizaciones tamién presuntamente vanguardistes xeneraron toa una riestra de lluches fraticides ente la izquierda que, ente l'ablucamientu d'unos y el gociu d'otros, gastaron munches enerxíes y esperances ente les fuerces de progresu.

**IZQUIERDA ASTURIANA** entiende que la vanguardia nun ye un títulu nin una condecoración qu'imponga naide y que se tenga pa siempre, sinón un papel a xugar en determináu momentu. Un partíu qu'aspire a ser el motor d'un procesu de rexeneración nacional y de fondos cambios sociales, que quiera ser la máxima espresión política de la izquierda social, que quier que la mayoría de la población lu percancie como la opción más coherente y, poro, como'l so referente políticu, ye un partíu que llucha, en certu sen, por ser la vanguardia del pueblu asturianu, pero eso nun quier dicir qu'un partíu nazca yá siéndolo y/o puea selo dalgún día y pa siempre, sinón que ye un papel n'evaluación -y evolución- constante, y que nun tien por qué ser exercíu por una única organización, yá que nos procesos de cambiu, la dirección del *bloque históricu* pue tar en manes d'un solu partíu, más d'un o nengún. Exemplos históricos hailos pa toos gustos, y el labor d'**IZQUIERDA ASTURIANA** nun ye facer futuroloxía, sinón esparder el so proyectu y el so mensaxe pa facer que'l pueblu trabayador asturianu vea a **IAS** como'l so referente políticamente organizáu.

**74.** Asumiendo como divisa la frase martiana *facere ye la mejor manera de dicere* entendemos que pa qu'esti proyectu puea ser creyible fae falta daqué más qu'esti documentu. Yá n'otra parte d'él sulliñáremos la importancia de la coherencia individual y colectiva na militancia política, y equí namás que diremos que l'actividá d'**IZQUIERDA ASTURIANA** habrá de tar siempre presidida pol másimu de democracia interna y de trespencia, especialmente pa los sos cabezaleros y representantes públicos, qu'habrán de ser nes instituciones y en tolos foros de participación política modelu d'honradez, coherencia y austeridá, única manera d'esanicar de la opinión pública los tópicos sobre l'actividá política y dir superando l'apatía de la población, que dirá menguando en tanto vaiga medrando un proyectu nel que se vea siempre la máxima coherencia ente lo dicho y lo fecho. **IZQUIERDA ASTURIANA** quier ser esi proyectu.

